

ጳውሎስ ቆርንቶስ አሳሰ ፃፊዳ ኮይሮ ኪታ ጊዳ ቆፋ

ጳውሎስ ቆርንቶስ አሳሰ ፃፊዳ ኮይሮ ኪታይ ፃፊቲዳይ ኢዚ ካሴ ቆርንቶሴን ኤሲዳ ዋሳ ኬላ ጊዳን ዲዛ አማኖን ዲሳ ጊሺኔ አማኖ ጊሽ ዳንዲዳ ማቶታ ቢርሻናሰ ጊዲኮ። ሄ ዋዴ ቆርንቶሴ ካታማያ ኩሜላ አላሜን ኤሬቲዳ ጊሪኬ አሳ ካታማ ጊዳይሳፔካ ቦላራ አካያ ጌቲቲዛ ኦሮሜ ካዎይ ሃሪዛ ዋና ካታማ። ሂና ሄ ካታማያ ኢዚን ዳሮ ጊታ ዛልዔይ ዛልዔቲዛሶ። ሃንኮ ዴሬ ዋጋ ባጋራ ጊዲኮ ዳሮ ዲቻ ቦላ ዳዉሲኔ ኢታ ሃናኒኔ ዲማ ዲማ ሚሹ አማኖን ዳሮ ኤሬቲዳሮ።

ሃዋሪይ ሃራፔካ ሎዔሊ ያለዲይ ዋሳ ኬላይ ጊዳን ዲዛ ሻኩቲላ ጊሽ። ኢሰታ ኢታ ኦሎ ጊሽ። ላይማ ጊሺኔ ኦኮኔ ጌሎ ጊሽ። ዋሳ ኬላ ጊሽ። ዓሎ አያና ኢሞታታ ጊሺኔ ሃይቆፔ ዳንላ ጊሻሳ። ሄሳሎካ ሃዋሪይ ሚሹራቾ ቃላዛ ሃይታ ሃ ኦይሻታ ቦላ ኢሰታሰ ሎዔሊ ሚንላ ዛሮ ኢሜሰ።

“ሲቆይ” ያሲ ባ አሳሰ ኢሚዳ ኢሞታ ኡባፊ አጭላ ጊዲዳይሳ ቆንጨሲዛይ ታማኔ ሄቫንላ ሹምፖይ ሃይሳ ሃ ማፃፋ ጊዳን ዳሮ ኤሬቲዳ ኪፍሌ ጊዲ ቆፊቲሰ።

- ሃ ማፃፋይ ኦይኪዳ ኩሜላ ቆፋ
- ጌሎሶ 1:1-9
- አማኒዛይታ ጋርሳን ሚጺቲዳ ሻኩቲላ 1:10-4:21
- ኢታ ኦሶኔ ሶ አሳ ዲሰ 5:1-7:40
- አማኒዛይታኔ አማኖንታ አሳ 8:1-11:1
- አማኒዛይታ ዲሲኔ ያሴ ጎይኖ ዋጋ 11:2-14:40
- ሃይቆፔ ኪርሰቶሳ ዳንላኔ አማኒዛይታ ዳንላ 15:1-58
- የሁዳን ዋዬ ቦላ ዲዛ አማኒዛይታ ማዳናሰ ኬሶ ሚሽ ሺሾ 16:1-4
- ኩሻ ቆፋ 16:5-24

1 ያሳ ሹኔን ዬሱሰ ኪርሰቶሳሰ ኪቲታናሰ ያይጌቲዳ ጳውሎሳፔኔ ኑ ኢሻ ሶሰቲኔሴፔ፤

2 ቆርንቶሴን ዲዛ ያሳ ዋሳ ኬላሰ፤ ጎዳ ዬሱስ ኪርሰቶሳስ ዲማተዳይታሲኔ ኢስታሳራ ኑሳራ ጎዳ ጊዲዳ ጎዳ ዬሱስ ኪርሰቶሳ ሱንላ አዋን አዋንካ ጭጊዛ አማኒዛይታራ ጊዳናሰ ጭጊቲዳ አሳ ኡባስ። 3 ኑ አዋ ያሳፌኔ ጎዳ ዬሱስ ኪርሰቶሳ፤ ኪያቴሌኔ ሳርይ አንቴሰ ጊዶ።

ያሳስ ጋላታ

4 ጎዳ ዬሱስ ኪርሰቶሳ ባጋራ አንቴሰ ኢማቲዳ ያሳ ኪያቴላ ጊሽ ኡባ ዋዴ አንቴ ጊሽካ ታኒ ያሳ ጋላታይስ። 5 ጋሶይ አይ ዮዮንካ፤ ሄሲካ ሃሳያን ጊዲን ኤራቴላ አንቴ ኡባን ዲሬቲዳታ። 6 ኪርሰቶሳ ጊሽ ኑ አንቴሰ ማርካቲዳይሲ አንቴ አቻን ማኒዴስ። 7 ሄሳ ጊሽ አንቴ ዬሱስ ኪርሰቶሲ ቆንጫና ጋላሰ ናጊሽን አያና ኢሞቴላታ፤ አይኮይካ አንቴሰ ፓጩና። 8 ጎዳ ዬሱስ ኪርሰቶሲ ናምዓንሉ ያና ጋላሳን አንቴ አንቴ ቦላ ቦርይ ባይንዳ ቤታና ማላ ወርሴሉ ጋካናሰ ኢዚ አንቴና ሎዔሉ ናገና። 9 ኢዚ ባ ናዛ ኑ ጎዳ ዬሱስ ኪርሰቶሳ ኢሲፊቴላኮ አንቴና ጭጊዳ ያሲ ኢዚ አማኒቲዳ ያሳ።

ቆርንቶሴ ዋሳ ኬላ ጋርሳን ማዴቲዳ ሻኬቴሉ

10 ታ አሻቶ! አንቴ ጋርሳን ሻኬቴሉ ደንታ ማላ አንቴሰ ኢሲ ዋዛናይኔ ኢሲ ቆፋይ ዳና ማላ አንቴ አንቴ ጋርሳን ኢሲኖ ጊዳና ማላ ጎዳ ዬሱስ ኪርሰቶሳ ሱንላን ታ አንቴና ዋሳይስ። 11 ታ አሻቶ! አንቴ ጋርሳን ፓላማይ ዲዛይሳ ታ ቃሎዔ ሶ አሳ፤ ሲያዲስ። 12 ዮዮንካ ሃይሳ ማላ፤ አንቴ ጋርሳን ኢሲ ኢሲ አሳይ “ታ ጳውሎሳ ባጋ” ጌስ፤ ባጋይ ቃሴ “ታ አጲሎሳ ባጋ” ጌስ፤ ባጋይ ቃሴ “ታ ኬፋ ባጋ” ጊሽን ሃራይ ቃሴ “ታ ኪርሰቶሳ ባጋ” ጌስ። ** 13 ሂሰቲኮ ኪርሰቶሲ ሻኬቲ ዋዴዴ? አንቴ ጊሽ ጳውሎሲ ካቁቲዳ? ዋይኮ ጳውሎሳ ሱንላን ማማቁቲዳቲ? 14 አንቴ ጊዶፊ ቄሪሰጳሳ፤ ጋዩዮሳ፤ ኣቲን ሃራ ኦናካ ታ ማማቆንታ ጊሽ ያሳ ጋላታይስ። * 15 ሄሳ ጊሽ ኦኒካ “ታ ጳውሎሳ ሱንላን ማማቁታዲስ” ጋና ኣሲ ዴና። 16 ቱሙካ ኢስቲፋኖሴ ሶ አሳ ማማቃዲስ። ሄይታ፤ ሃራ ታ ማማቁዳኮኔ ታ ኤሪዛዴይ ዴና። * 17 ኪርሰቶሲ ታና ኪቲዳይ ማሽራቾ ቃላ ዮታናሰ ኣቲን ማማቃናሰ ጊዳና። ኪርሰቶሳ ማሰቃሌይ ሃዳ ጊዶንታ ማላ ታ አሳ፤ ጊዲዳ ጨንጫቴላን ሳባኪኬ።

* 1:12 ኬፋ ጉሲ ጳፅሮሳ ጉስ። * 1:12 ሃዋ 18:24 * 1:14 ሃዋ 18:8፤ 19:29፤ ኦሮ 16:23 * 1:16 1ቆሮ 16:15

የሳ ዋልቃኔ ኤራቴል ጊዲዳ ከርሰቶሳ

18 ማስቃለዛ ከታይ ቆያና ዲዛይታስ ኤያቴላ። ጊደ ኣቲን ኣታና ዲዛ ኩስ ጊዲኮ የሳ ዋልቃ። 19 “ጨንጫታ ጨንጫቴላ ታ ኢስታፌ ቆይሳና፤ ኤራንቻታ ኤራቴላ ታ ሃዳ ኦላና” ጌቴቲ ጌሻ ማፃፋን ፃፊቲዳስ። *

20 ጨንጫይ ኣዋን ዲዜ? ታማሪዳ ኤራይ ኣዋን ዲዜ? ሃይሳ ዋዴዛ ፒልጊ ኤሪዛይ ኣዋን ዲዜ? የሲ ሃ ኣላሜዛ ኤራቴል፣ ኤያቴል ኦሊቤኔ? * 21 የሳ ኤራቴላፌ ዴንዲዳይሳን ኣላሜይ ባ ኤራቴላ ጋሶን የሳ ኤሮይ የኒን ሳባኮ ኤያቴላን ኣማኒዛይታ ኣሻናስ የሳ ሼኔ ጊዲዳስ። 22 ኣይ ዋዴካ ኣይሁዳቲ ዲማ ማለታ ኮዩቴስ። ጊሪኬ ኣሳቲ ቃሴ ኤራቴል ኮዩቴስ፤ 23 ኩኒ ጊዲኮ ካቁቲዳ ከርሰቶሳ ሳባኮስ። ሄሲካ ኣይሁዳታስ ቆይጶ፤ ኣይዛቤታስ ቃሴ ኤያቴላ። 24 የሲ ዪይጊዳይታስ ኢስቲ ኣይሁዳታ ጊዲን ዋይኮ ጊሪኬ ዴፊ ኣሳ ጊዲኮካ ከርሰቶሲ የሳ ዋልቃኔ የሳ ኤራቴላ። 25 ጋሶይካ ኣሳ ኤራቴ የሳ ኤያቴላ ኣዲዳ ኤራቴላ፤ ኣሳ ሚኖቴላፌ የሳ ላፋቴላ ኣዴስ፤

26 ታ ኢሻቶ! ካሴ ኢንቴ ዪይጌቲዛ ዋዴ ኢንቴ ኣይ ማላ ኣሳኮኔ ኣኔ ቆጊቲ። ኣሳ ቆፋ ማላ ጊዲኮ ኢንቴፌ ዳሪዛይቲ ኤራታ ጊዴኬታ። ኢንቴፌ ዳርቲ ዋልቃይ ባይንዳይታ፤ ዳርቲካ ጌታ ኬላ ኣሳፔ ዩሊቴቤኬታ። 27 ጊደ ኣቲን የሲ ኤራታ ዩላቻናስ ዳራፔ ኤያታ ደሪዳስ፤ የሲ ሚኖታ ዩላቻናስ ኣላሜዛፔ ዳራጊንቻታ ደሪዳስ። 28 የሲ ሃንኮ ኣማኖንታ ኣሳ ኣቻን ዴቴስ ጌቴቲ ኤሬቲዛ ሚሻታ ባይንዳ ሚሻ ማላ ኦላና ሃይሳ ኣላሜዛን ለቁቲዳይታኔ ካዉዪዳይታ ላፋታ ደሪዳስ። 29 ሄሳካ ኢዚ ኦሊዳይ ኦኒካ ኢዛ ሲንላን ጨቁቶንታ ማላ። 30 ኢንቴና ቃሴ የሲ ዩሱስ ከርሰቶሳራ ኢሲፌቴላ ዳና ማላ ኦሊዳስ። ሄሳ ጊሻ የሲ ዩሱስ ከርሰቶሳ ኩ ኤራቴል፣ ኩ ዪሎቴል፣ ኩ ጌሻቴላኔ ኩ ኣሺዛዴ ጊደና ማላ ኦሊዳስ። 31 ሄሳ ጊሻ ካሴ “ጨቁዛ ኣሲ ጎዳን ጨቆ” ጌቴቲ ጌሻ ማፃፋን ፃፊቲዳ ማላ። *

2

ካቁቲዳ ከርሰቶሳ ጊሻ ታማርሶ

1 ታ ኢሻቶ! ታ ኢንቴኮ የሳ ፀራ ቆንጨሳና ቢዳይ ታስ ዱና ቃራቴላ ዋይኮ ኤራ ዳርይ ዲዛ ጊሻ ጊደና። 2 ታ ኢንቴ ጊደን

* 1:19 ኢሳ 29:14 * 1:20 ኢዮ 12:17፤ ኢሳ 19:12፤ 33:18፤ 44:25
* 1:31 ኤር 9:24

ዲዛ ዎዴ ካቁቲዳ ዩሱስ ኪርሰቶሳፕ ኣቲን ሃራ ኤርንታ ማላ ታ ባጋራ ሙርታዲስ። 3 ታ ኣንቴሮ ዳሮ ዳቡራን፣ ያሻቴላኒኔ ዳሮ ኮኮራሽ ባዲስ። 4 ታ ቃላይኔ ሳባኮይካ ኣያና ዎልቃ ቆንጨሴላንፕ ኣቲን ጨሞኒኔ ኤራ ዳሮን ጊዴና። 5 ሄሲካ ኣንቴ ኣማኖይ ያሳ ዎልቃንፕ ኣቲን ኣሳ ጨንጫቴላ ቦላ ፃጶንታ ማላ ሃኒዴስ።

ዒሎ ኣያናፕ ኣሜቲዳ ኤራቴላ

6 ኑ ካሃ ኩንሊዳ ኣሳታ ኣቻን ኤራ ሃሳያ ሃሳኖስ፤ ጊዴ ኣቲን ሃይሳ ሃ ኣላሜዛ ኤራቴላ ጊዴና፤ ዎይኮ ጳያና ዲዛ ሃ ኣላሜዛ ሃሪዛይታ ኤራቴላ ጊዴና። 7 ጊዴ ኣቲን ኑ ሃሳዪዛይ ካሴ ቆቴቲ ዲዛ ያሳ ፀራ ኤራቴላ፤ ሄ ኤራቴላይ ያሲ ዳሮ ዎዴፕ ካሴ ኑና ቦንቸሰ ካሴቲዲ ዉርሲ ዎሊዳይሳ። 8 ሃ ኣላሜዛ ሃሪዛይታፕ ኦኒካ ሃ ኤራቴላ ኤሪቤና፤ ኤሪዳኮ ኢሰቲ ቦንቸ ጎዳ ካቁቴና። 9 ጊዴ ኣቲን ጌሻ ማፃፋን

“ኣሳ ኣይፌይ ቤኖንታዝ፣

ኣሳ ሃይሊ ሲኖንታዝ፣

ኣሳ ዎዝናይካ ቆፖንታዝ

ያሲ ባ ደሲዛይታሰ ገሊሲዴስ” ጌስ። *

10 ያሲ ጊዲኮ ሃሳ ባ ኣያና ባጋራ ኑስ ቆንጨሲዴስ። ኣያናይካ ያሳሰ ዲዛ ጨማ ዮዎ ኣሾንታ ዉርሲ ፒልጊ ያሊስ። 11 ኣሳ ጋርሳን ኢዛዴስ ዲዛ ኣያናፕ ኣቲን ኢዛዴ ዎዝና ኤሪዛይ ኦኔ? ሄሳሶካ ያሳ ኣያናፕ ኣቲን ያሳ ቆፋ ኤሪዛይ ኦኒካ ዴና። 12 ያሳፌ ኑስ ኣሜቲዳይሳ ኦኒ ኤራና ማላ ያሳ ኣያናይ ኑስ ኣሜቲዴስ ኣቲን ኦኒ ሃይሳ ሃ ኣላሜዛ ኣያና ኤኪቤኮ።

13 ኑ ዮቲዛይ ሃይሳ፤ ኑ ኣሳፕ ታማሪዳ ቃላ ጊዴንታ ኣያናፕ ታማሪዳ ቃላ ሃሳኖስ። ኣያና ቱማቴላካ ኑ ቆንጨሲዛይ ኣያና ቃላና። 14 ያሳ ኣያናይ ኢዛን ባይንዳ ኣሲ ያሳ ኣያናፕ ጊዲዳዝ ኤካናሰ ዳንዳዬና፤ ጋሶይካ ሃሳ ማላ ዮይይ ኢዛሰ ኤያቴላ፤ ኢዚ ባሲ ኣያናን ፓጨቴዛይ ጊዲዳ ገሸ ኢዚ ኤራናሰ ዳንዳዬና። 15 ያሳ ኣያናይ ኢዛን ዲዛዴይ ቃሰ ዉርሲካ ፓጨፕ ኣቲን ባሲ ኦናንካ ፓጨቴና። 16 ሄሲካ

“ጎዳ ቆፋ ኤራናሰ ዳንዳዬዛይ ኦኔ?

ኢዛ ዞራናሰ ዳንዳዬዛይ ኦኔ?”

ጌቲቲ ካሴ ጌሻ ማፃፋን ፃፌቲዳ ማላ፤ ኑስ ጊዲኮ ኪርሰቶሳ ዎዝናይ ዴስ። *

* 2:9 ኣሳ 64:4 * 2:16 ኣሳ 40:13

3

ዋሳ ከላ ጊደን ሜዴቲዳ ሻኬቴላ

1 ታ አሻቶ! ታ ኢንቴና ኢንቴ ኪርሰቶሳን ቡር ጉላ ናይታ ማላኔ ቡር አማኖይ ጌሎንታ አሳ ማላፕ ኣቲን አያናን ኩሚዳ አሳ ማላ ጋዳ ኢንቴሰ ሃሳያናሰ ዳንዳያቤኬ። 2 ኢንቴ ቡር ሚኖንታ ጊሽ ታ ኢንቴና ማላ ፓሃዲሰ ኣቲን ቡር ሚኖ ካላ ሚዛቤኬ፤ ሃዒካ ጊዲኮ ኢንቴ ቡርኮ! * 3 ኢንቴ ሃዒካ ቡር አማኖን ሚኖንታይታ ጊዲዳ ጊሽ ኢንቴ ጊደን ቃናቴቴላኔ ፓላማይ ዴሰ፤ ሂሰቲን ኢንቴ ቡር አማኖን ሚኖንታ አሳ ማላ ጊዴኬቲ? ኢንቴ ኦሶይ ጮ ሜላ ኣሲ ኦሊዛይሳ ማላ ጊዴኔ? 4 ጋሶይካ ኢንቴ ጋርሳፌ ኢሶይ “ታ ጳውሎሳሳ” ሃንኮይሰ ቃሰ “ታ ኣጲሎሳሳ” ጊኮ ኢንቴ ጮ ኣሾ ቆፋን ፃላላ ዲዛ አሳ ማላ ጊዴኬቲ? *

5 ኤር! ጊደ ኣቲን ኣጲሎሲ ኣዜ? ጳውሎሲካ ኣዜ? ኢሰቲ ጎዳይ ኢሰታሰ ኢሳሰ ኢሳሰ ኢሚዳ ማላ ኦሊዛ ኦሳንቻታ፤ ኢንቴካ ኢሰታ ባጋራ አማኒዴታ። 6 ታ ቶካዲሰ፤ ኣጲሎሲ ሃሌ ኡሺዴሰ፤ ዲቺዳይ ጊዲኮ ያሳ። * 7 ሃሳ ጊሽ ዲቺዛይ ያሴ ኣቲን ቶኪዛዴይካ፤ ሃሌ ኡሺዛዴይካ ኣይኮካ ጊዴቴና። 8 ቶኪዛዴ ጊዲን ዋይኮ ኡሺዛዴ ጊዲን ኢሰቲ ኢሲኖ፤ ኢሰታፌ ኢሳዴይ ኢሳዴይ ባ ኦሶ ማላ ዋይቶ ኤካና። 9 ጋሶይካ ኑ ያሳራ ኢሲፌ ኦሊዛይታ። ኢንቴካ ያሳ ጎሻ ጋዴኔ ያሳ ከላታ።

10 ያሳፌ ታሰ ኢሜቲዳ አሞቴላ ጊና ከሌ ከዲዛ ሂላ ማላ ከላይ ኤቃናሰ ሎዔላ ጊሊሳዲሰ፤ ኢዛ ቦላ ሃራ ኣሲ ከላ ከፃና። ጊደ ኣቲን ከላ ከዲዛዴይ ዋሰቲ ከፃናኮኔ ናጌታናሰ ቤሴሰ። 11 ጋሶይካ ከላይ ከፃቴላ ኦይኬቴዳፕ ጉዬ ሃራ ዋሊ ቃሴ ከፃና ዳንዳዪዛዴይ ኦኒካ ባዋ፤ ሂሲካ ከላሰ ኮይርይ ዩሴሰ ኪርሰቶሳ። 12 ኦኒካ ከላይ ኮይር ከፃቴዳይሳ ቦላ ዋርቃን ዋይኮ ቢራን ቦንቸቲዳ ሹቻን ዋይኮ ሚላኒኔ ማታን ዋይኮ ማቃን ከዲኮ። 13 ኢዛዴ ኦሶይ ኣይ ማላ ፒርዳ ጋላሰ ቆንጫና። ጋሶይካ ሂ ጋላሳይ ኢዛ ሃ ፖያይ ዲዛሶ ከሳና። ሄ ኦሶይ ታማን ፓጩታና ጊሽ ኢሳዴ ኢሳዴ ኦሶይ ኣይ ማላ ቡር ታማን ፓጩታና። 14 ኦኒካ ከዲዳ ከሌ ሚኒ ኤቂዛ ጊዲኮ ሃሳዴይ ባ ዋይቶ ኤካና። 15 ኢዛ ኦሶይ ፀጌቴዳዴይ ጊዲኮ ዋይቶይ ኢዛሰ ዴና ሺን ኢዛዴይ ባ ሁዔሰ ኣታና። ጊደ ኣቲን ኢዛዴ ኣቴሊ ታማፕ ኣሲ ዋይዲ ኣቲዛ ኣቴላ ማላ ጊዳና።

* 3:2 ኢብ 5:12-13 * 3:4 1ቆር 1:12 * 3:6 ሃዋ 18:4-11፤ 24-28

16 እንገት እንገት ሁዔሰ ያሳ ከሌ ገዲዳይሳኔ ያሳ ኣያናይ እንገት ገደን ዲዛይሳ ኤሪከቴ? * 17 ኦኒካ ያሳ ከሌ ላሊኮ ያሰ ኢዛይ ላላና። ያሳ ከሌ ገሻ። ሄሲካ እንገቴናኮ!

18 ኦኒካ ባርካ ባና ባሌላይ፤ እንገቴፌ ኦኒካ ሃይሳ ሃ ኣላሜዛን ባና ኤራንቻ ማላ ቆፒኮ ኢዛይይ ኤራንቻ ገዲና ማላ ባና ባርካ ኤያ ማላ ቆዶ። 19 ሃይሳ ሃ ዴሬዛ ኤራቴሌ ያሳ ኣቻን ኤያቴላ። ካሴ ገሻ ማፃፋን “ኢዚ ኤራንቻታ ኢሰታ ጌኔ ኦሶ ጌዶን ዛሪዲ ኦይካና” ጌቴቴ ፃፊቴዴሰ። * 20 ቃሴካ ሃራሶን “ኤራንቻታ ቆፋይ

ማላ ሃዳ ገዲዳይሳ ጎዳይ ኤሬሰ”

ጌቴቴ ፃፊቴዴሰ። * 21 ሄሳ ገሽ ዉሪካ እንገቴሰ ገዲዳ ገሽ ኦኒካ ኣሳን ጩቁቶፎ። 22 ጳዉሎሳ ገዲን፣ ኣጵሎሳ ገዲን፣ ዋይኮ ከፋ ገዲን፣ ኣላሜ ገዲን፣ ዴያ ገዲን፣ ዋይኮ ሃይቆ ገዲን፣ ሃዲ ዲዛዝ ገዲን፣ ዋይኮ ቡሮ ያና ሚሽ ገዲን፣ ዉሪካ እንገቴሳ። 23 እንገቴካ ከርሰቶሳይታ፤ ከርሰቶሲካ ያሳይሳ።

4

ከርሰቶሳ ሃዋሬታ

1 ሄሳ ገዲዳ ገሽ ኣሲ ዉሪካ ኦና ከርሰቶሳ ኦሳንቻታ ማላኔ ያሳ ፀራ ቆንጩሳናሰ ሃዳራ ኤኪዳ ኣሳ ማላ ቆዳናሰ ቤሴሰ። 2 ሃዳራ ኤኪዳይቴካ ኣማኔቴዳይታ ገዲናሰ ቤሴሰ። 3 ታ ቦላ እንገቴ ፒርዲንካ ዋይኮ ዲላታ ኣሳይ ፒርዲንካ ታ ባጋራ ታሰ ኣይኮይ ባዋ። ሃራይ ኣቶሺን ታርካ ታ ቦላ ፒርዲኬ። 4 “ታ ኤሪዛ ማላ ታኒ ታ ዋዘናራ ሲጳዛ ሚሺ ባዋ፤ ገዶ ኣቴን ሄሳ ጉሰ ታ ቦላ ሞሮይ ባዋ” ጉሰ ገዴና። ቡሮ ታ ቦላ ፒርዳናይ ጎዳ። 5 ሄሳ ገሽ ፒርዳና ዋዴይ ጋኮንታ ሃራ ኣይ ዮዖካ ፒርዶፍቴ። ጎዳይ ያና ጋካናሰ ናገቴ፤ ኢዚ ጳማ ገደን ቆቴቴዳይሳ ቡሮ ቆንጩ ከሳና። ኣሳ ዋዘና ገደን ዲዛ ቆፋካ ቆንጩ ከሳና። ሄ ዋዴ ኢሲ ኢሲ ኣሲ ቤሲዛ ጋላታ ያሳ ኣቻፌ ኤካና።

6 ሄሳ ገሽ ታ ኣሻቶ! ታ እንገቴና ጎሳና ማላ ሃ ዮዖዛን ታናኔ ኣጲሎሳ እንገቴሰ ለሚሶ ሺሻዲሰ፤ ታ ሃይሳ ኦሊዳይ “ፃፊቴዳይሳፌ ኣጶፋ” ገዛይሳ እንገቴ ኦፔ ታማራና ማላ ጋዳ። ሄሳ ገሽ እንገቴ ኢሳዴ ሳቢዲ ሃራ ኣሰ ካፍሰሰ ቤሴና። 7 ኔኒ ኣዛን ኣቆይ? ኔኒ ሃራፔ ኤኮንታ ኣቴዳ ሚሺ ኣዜ? ሂሰቴን ኔ

* 3:16 1ቆር 6:19፤ 2ቆር 6:16 * 3:19 ኢዮ 5:13 * 3:20 ማዛ 94:11

ወርሳካ ኤኪዳይ ሃራ አሳፔ ጊዲኮ፣ ሃራ አሳፔ ኤኮንታ አሳ ማላ አዛሰ ጨቁታይ?

8 ሃራ ጊዲኮ ኢንቴሰ ኮሺዛዝ ኢንቴ ወርሲ ዳሚዳታኔ ዲሬቲዳታ፤ ኮፔካ ሻኬቲዲ ካዎቲዳታ። ኢንቴ ቱሙካ ካዎቲዳኮ ኑካ ኢንቴናራ ካዎታናኮ ሺን። 9 ጋሶይካ ያሲ ኑና ሃዋሬታ ኑ ቦላ ሃይቆ ፐርዳይ ፐርዳቲዳ አሳታ ማላ አሳ ኡባፌ ወርሴሌ ኦሊዳዝ ታሰ ሚሳቲሰ። ሄሳ ጊሽ አላሜሰ ኪታንቻታሲኔ አሳ ኡባሰ ካሳ ሚሽ ጊዲደሰ። 10 ኑ ኪርሰቶሳ ጊሽ ኤያታ ጊዲደሰ። ኢንቴ ቃሰ ኪርሰቶሳን ኤራንቻታ፤ ኑኒ ዳቡራንቻታ፤ ኢንቴ ጊዲኮ ሚኖታ፤ ኢንቴ ቦንቹቲዳይታ፤ ኑኒ ጊዲኮ ካወሻታ። 11 ሃኖ ጋካናሰ ኑ ጋፎሰ፤ ሳሜቶሰ፤ ካሎቶሰ፤ ቡኬቶሰ፤ አቁዛሶይ ጳዩን ዋዩቶሰ። 12 ኑ ኩሼራ ኦሊ ዳቡሪ አቆሰ። ኑና ቃንጊሺን ኑ ቃሰ አንጀሰ፤ ኑና ጎዲሺን ኑ ዳንዳኖሰ። * 13 ኑ ሱንሰ ኢሰቲ ሞሪሺን ኑ ቃሰ ሎዖ ዛርሰ፤ ሃኖ ጋካናሰ ኑ ቢታፌ ፐቲቲዳ ቡራ ጊዲደሰ።

14 ታ ሃይሳ ኢንቴሰ ፃፊዛይ ኢንቴና ታ ደሲዛ ታ ናይታ ማላ ዘራናሰ ጋዳ አቲን ኢንቴና ዩላቻናሰ ጊዳና። 15 ኢንቴና ኪርሰቶሳን ዲቹዛ ዳር አሳቲ ዲኮካ ኢንቴሰ ዳር አዎቲ ዳቲና። ታኒ ቃሰ ዩሱሰ ኪርሰቶሳ ሚሺራቾ ቃላን ኢንቴና ዩላዲሰ። 16 ሄሳ ጊሽ ኢንቴ ታና ሚሳታና ማላ ታ ኢንቴና ዋሳይሰ። 17 ጎዳን ዳር ደሴቲዳይሳኔ አሜንቲዳ ታ ና ጃምቶሳ ታ ኢንቴኮ ኪቲዳይ ሄሳ ጋሶና። ኢዚካ ዲማ ዲማ ሶን ዲዛ ዋሳ ኬላ አሳ ወርሲ ታ ታማርሲዳ ቲሚርቴዛራ ጋጊዛይሳ ዩሱሰ ኪርሰቶሳን ዲዛ ዴዖ ኦኔ ጊሽ ኢንቴና ኢዚ ቆፊሳና።

18 ኢንቴፌ ኢሲ ኢሲ አሳቲ ታ ናምዓንሉ ኢንቴና ቤያናሰ ቦንታዝ ኢሰታሰ ሚሳቲን ኦቶሬቲዳ። 19 ጊዳ አቲን ጎዳ ሼኔ ጊዲኮ ማታራ ታ ኢንቴኮ ባና። ሄ ባዳ ሄ ኦቶራንቻቲ ሃሳዪዛዝ ፃላላ ጊደንታ ኢሰታሰ አዛ ዋልቃይ ዲዛኮኔ ቤያና ኮያይሰ። 20 ጋሶይካ ያሳ ካዎቲሌ ጮ ዲና ፃላላ ጊደንታ ዲናፔ ሰላራ ያሳ ዋልቃ። 21 ኤር! ኢንቴ ኮዩዛይ አዋይሴ? ዲርቃ ኤካ ቦዩ? ዋይኮ ሲቆራኔ አሽኬቴላ አያናራ ቦ?

5

ዋሳ ኬላን ኦሴቲዳ ዩላቹዛ ናጋራ

1 ኢንቴ ጋርሳን ዩላቹዛ ላይማይ ዲዛይሲ ዋሬቲሰ። ሄሳ ማላ ቱናቴሌ አማኖንታ ዳሬታ አቻንካ ዳና። ባ አዎ ማቾ ኤኪዳ ኢሲ

* 4:12 ሃዋ 18:3

አንቲኮን ዴስ። * 2 ሂሰቲን ሄሳ ማላ ዩላቸዛ ሚሺ አንቲ ጊደን ዲሺን አዛሰ ኦቶሬቲቲ? ሄሳፌ ሄ ዮዎዛን አንቲ ሙዞታናሰ አንቲና ቤሴኔ? ሄሳ ማላ ኦሲዳዳ አንቲ ጋርሳፌ ዲጊቲ።

3 ታ አንቲናራ አሾን ኢሲፌ ደንታ አጊኮካ አያናን ቃሰ አንቲናራ ዳይሰ፤ ታ ሃዒ አንቲናራ ዲዛ ማላ ሄሳ ኦሲዳዳ ቦላ ፐርዳዲስ። 4-5 አንቲ ሺቁዛሶን ታ አንቲናራ ዲዛ ጊሽ ጎዳ ዩሱሳ ሱንጻኒኔ አንቲ ጊደን ዲዛ ኑ ጎዳ ዩሱሳ ዋልቃን ሄ ዋራንቻዛ አሾይ ቆዩን ኢዛ ሽዎፖይ ጎዳ ጋላሳን አታና ማላ ሄሳ ማላ አሲ ፃላዔስ አጂ ኢሜቶ።

6 አንቲ ጨቁቲዛይሲ ሎዎሰ ጊዴና። ጉላ ኢርሾይ ዳር ቡኬሶ ዴንጤዲዛ ኤሬኬቲ? * 7 አንቲ ሃዒ ኢርሾይ ባይንዳ ኦራላ ቡኬሶ ጊዳና ማላ ካሴ ጫላ ኢርሾዛ አንቲ ጊደፌ ዲጊቲ። ኑ ፓዚጋ ደርሰ ጊዳዳ ኪርሰቶሲ ኑሰ ያርሼቲዴስ። ** 8 ሄሳ ጊሽ አኔ ኑኒ ፓዚጋ ባዓሌዛ ቆሆይኔ ኢታቲላ ኢዛን ኩሚዳ ካሴ ጫላ ኢርሾ ቦላ ጊደንታ ኢርሾይ ባይንዳ ኡኬላን ሱሬቲላኒኔ ቱማን ቦንቸሰ። *

9 አንቲሰ ላይማቲዛ አሳታራ ኢሲፌቲላ ደንታ ማላ ታ አንቲሰ ካሴ ዳብዳቤ ፃፋዲሰኮሺን። 10-11 አንቲ ማላ አማኖንታ ላይማቲዛ አሳራ ጊደንታ ዋይኮ ጮ ጋጺጋጺዛይታራ፣ ካይሶቲዛይታራ፣ ኤቃሰ ጎይኒዛይታራ ጋገፍቲ ጉሰ ጊደንታ ዲሺን ሃዒ ታ ፃፊዳይ አማናይሰ ጊሼ ላይማቲዛይታራ ዋይኮ ማሶቲዛይታራ፣ ጋጺጋጺዛይታራ፣ ኤቃሰ ጎይኒዛይታራ፣ አሳ ሱንጻ ዋሪዛይታራ ዋይኮ ጫይዛይታራ፣ አሳ ሚሽ ቦንቁዛዴንታራ አንቲሰ ኢሲፌቲላ ደፖ። ሄይታንታ ማላራ ሃራይ አቶ ሺን ካሊካ ኢሲፌ ሞፕቲ።

12 ሃንኮ አማኖንታ አሳ ቦላ ፐርዳናሰ ታና አዚ ጋሊዜ? ዋሳ ኬላን ዲዛይታ ቦላ አንቲ ፐርዴኬቲ? 13 ዋሳ ኬላፌ ካሬራ ዲዛይታ ቦላ ጊዲኮ ፆሲ ፐርዳና “አንቲ አንቲ ጊደፌ ኢታ አሰ ዲጊቲ” ጌቲቲ ጌሻ ማፃፋን ፃፊቲዴስ።

6

አማኒዛይቲ ባ ጋርሳን ሞቲታናሰ ቤሴና

* 5:1 ዛሬ 22:30 * 5:6 ጋላ 5:9 * 5:7 ፓዚጋ ቦንቸዛ ዋዴ አሳይ ጫላ ኢሪሾ ጊዳዳ ሚሺ ካላን ዩጌና። * 5:7 ኬሳ 12:5 * 5:8 ኬሳ 13:7፤ ዛሬ 16:3

1 አንቲ ጋርሳፌ ኢሳዴስ ሃራ አማኒዛዳራ የጾይ ዲኮ ሄ የጾዛ አማኒዛይታ አቶ ሸሻናይሳ ዋሰቲ አማኖንታ አሳ ሲንላን ፐርዳታና ሸሸዜ? 2 አማኒዛ አሳይ አማኖንታ አሳ ቦላ ፐርዳናይሳ አንቲ ኤሬኬቲ? አንቲ ቡር አላሜ ቦላ ፐርዳንዳታ። ጊዲኮካ ሄሳ ጉላ የጾ ቦላ ፐርዳናስ ዳንዳዬኬቲ? 3 ሃይሳ ቢታ ቦላ ዲዛ ፐርዳይ አቶሺን አንቲ ቡር ኪታንቻታ ቦላ ፐርዳናይሳ ኤሬኬቲ? 4 አንቲ አንቲ ጋርሳን ኦዬቲኮ አማኒዛይታ ማባራፔ ካሬን ዲዛይታኒኔ ካዴቲዳ አሳታ ሲንላን ዋሰቲ አንቲ የጾ ሸሸቲ? 5 ታ ሄሳ አንቲስ ጊዛይ አንቲና ዬላቻናሳ። አንቲ ጋርሳን አማኒዛይታ ጊሊሳናስ ዳንዳዪዛ ዋዝናማ አሲ ዴኔ? 6 ጊዶ ኦቲን አማኒዛዳይ ሃራ አማኒዛዳ ሞታናስ አላሜ ፐርዳ ኬፊ ባናስ ቤሲዜ?

7 አንቲ ጋርሳን ኢሶይ አሳ ሞቶይ አንቲ ኩንዳሳስ ማላታ ቤሴስ። አንቲ ቆሃናፔ ቆሃቲኮ ሎዴኔ? ቃሴካ አንቲ አስ ባሌላናፔ አንቲና አሲ ባሌሊኮ ሎዴኔ? 8 አንቲ ሃ ቆሃታናፔ ጌዴ ቆሃታኔ ባሌሊታ። ሄሲካ አንቲ አሻታ።

9 ማካላንቻቲ ያሳ ካዋቴሌ ጌሎንታይሳ ኤሬኬቲ? ሄሳ ማላ የጾን ባሌቶፍቲ። ላይማታና ቃቃቲዛይቲ። ኤቃ ኤቁዛይቲኔ አዳይ አዳራ ላይማቲዛይቲ። 10 ዋይኮ ካይሶቲ። ጋጺጋጺዛይቲ። ማሶቲዛይቲ። አስ ጫይዛይቲኔ ቦንቁዛይቲ ያሳ ካዋቴሌ ላቴቲና።

11 አንቲፌ ኢሲ ኢሲ አሳቲ ሄይታንታ ማላ ሸን ሃዒ ቃስ ጎዳ ዬሱስ ኪርሰቶሳ ሱንላኒኔ ኑ ያሳ አያናን ሜጨቲዳታ፤ ዲማቲዳታኔ ዲሊዳታ።

ባ አሳቴላን ያሳ ቦንቻ

12 ሃራይ ዉሪካ ታስ አሜቲዳስ፤ ጊዶ ኦቲን ዉሪካ ጎዒዛዝ ጊዳና። ዉሪካ ታስ አሜቲዳስ ጊዶ ኦቲን አይ ሚሸካ ታና ሃራና። * 13 ቃሴ ካሊ ኡሎሳ፤ ኡሎይካ ካላሳ፤ ጊዶ ኦቲን ያሲ ናምዓካ ዳይሳና፤ አሳቴሌ ጎዳሰፌ ኦቲን ላይማስ ጊዳና። ጎዳይካ አሳቴላሳ። 14 ያሲ ጎዳ ሃይቆፔ ዴንሳዳ ማላ ኦናካ ቃሴ ኢዚ ባ ዋልቃን ሃይቆፔ ዴንላና።

15 አንቲ አሳቴላይ ኪርሰቶሳ አሳቴሌ ቢሊቲ ጊዲዳይሳ አንቲ ኤሬኬቲ? ሃሰቲን ታ ኪርሰቶሳ አሳቴላፌ አሳ ላይማን አቁዛ አሳታራ ኢሲኖ ሂሰቶ? ሙሌካ ቤሴና። 16 ዋይኮ ላይማቲዛሪራ አቁዛዳይ ኢዚራ ኢሲ አሾ ጊዲዛይሳ አንቲ ኤሬኬቲ? “ናምዓይ ኢሲ አሾ ጊዴቲስ” ጌቲቲዳስ። * 17 ጊዶ ኦቲን ጎዳራ ኢሲኖ ጊዲዛዳይ ኢዛራ ኢሲ አያና ጊዳስ።

* 6:12 1ቆር 10:23 * 6:16 ሜዴ 2:24

18 ላይማጥ ሃኪቲ፤ አሲ ኦሊዛ ሃራ ናጋራይ ወሪ ኢዛዳ አሾፔ ካራራ ሃኔሰ። ላይማ ላይማቲዛዳይ ጊዲኮ ባርካ ባ አሳቴሉ ቦላ ናጋራ ኦሌሰ። 19 አንቴ አሳቴላይ አንቴ ጋላን ዲዛ ዲሎ አያናሰ ዲሳሶ ጊዲዳይሳ አንቴ ኤሬኬቲ? ሄ አያናይካ አንቴ ያሳፌ ኤኪዳይሳ። አንቴካ አንቴሰ ጊዳኬታ። * 20 አንቴ ሚሻን ሻማቲዳታ። ሄሳ ጊሽ አንቴ አንቴ አሳቴላን ያሴ ቦንቺቲ።

7

ኤኮ ጊሺኔ ጌሎ ጊሽ ሽቂዳ ኦይሾኔ ዛር

1-2 አንቴ ታሰ ፃፊዳ ማላ አሲ ማጫሳኮ ጋኮንታ አገዛኮ ሎዎኮ! ጊዳ ኦቲን ላይማጥ ናጌታናሰ ኦቲማሳሰ አሳሰ አሳሰ ማቻ ዱ። ማጫሳሰካ ኢሲኔይሰ ኢሲኔይሰ አዚናይ ዶ። 3 አዚናይ ባ ማቺይሰ ኮሺዛዝ ወርሲ ኦሎ። ማቻካ ባ አዚናሰ ኮሺዛዝ ወርሳ ኦሎ። 4 ማቺ አሳቴሉ ኢዚሰ ፃላላ ጊዳንታ አዚናሳራ ኮላ። ሄሳላካ አዚና አሳቴሉ ኢዛሰ ፃላላ ጊዳንታ ማቺይሳራ ኮላ። 5 ናምዓይ ዶሳን ዎሳሰ ጊዲ ዞሬን ጊዳ ጊዲ ቃቺዳ ጋላሳታፔ ኦቲን ሃራ ጋላሰ ኢሶይ አሳሰ አካይ ጎፐቲ። ሄሳ ጋሶን አንቴሰ አንቴና ሃርይ ያኒን ፃላዔይ አንቴና ፓጮንታ ማላ ናምዓይ ኢሲፌ ኦቂቲ።

6 ታ ሄሳ ጊዛይ ጮ አዛዘ ማላ ጊዳንታ ዞሬ ዞራይሰ። 7 አሲ ወሪ ታ ማላ ማቻ ኤኮንታ ዲዛኮ ታ ዶሳይሰ። ጊዳ ኦቲን ኢሲ ኢሲ አሳሰ ያሳፌ ኢማቲዳ ዱማ ኢሞታይ ዴሰ። አሳሰ ዱማ ኢሲ ኢሞታይ ዴሰ። ሃንኮይሳሰ ቃሰ ሃራ ኢሞታይ ዴሰ።

8 ቡር ኤኮንታይታኔ ጌሎንታይታ ጊሽ ቃሴካ አዚናይ ሃይቂዳ ማጫሳታ ጊሽ ታ ጊዛይ ኢሰቲ ጌሎንታኔ ኤኮንታ ታ ማላ ዲዛኮ ኢሰታሰ ሎዎ ጋይሰ። 9 ጊዳ ኦቲን ኢሰቲ ባና ናጋናሰ ዳንዳኮንታይታ ጊዲኮ ጌሎቶኔ ኤኬቶ፤ ጮ አሞን ፀጌታናፔ ኤኮይኔ ጌሎይ ሎዎ።

10 ኤኪዳይታሲኔ ጌሊዳይታሰ ታ አሚዛ አዛዘይ ሃይሳ። ሄሲካ ጎዳ አዛዘፔ ኦቲን ታ አዛዘ ጊዳና። አዚና ጌሊዳ ማጫሳያ ባ አዚናፔ ሻኬቱፋ። 11 ሻኬቲዛ ጊዲኮ ሃራ አዚና ጌሎንታ ኦቲ። አካይ ጊኮ ባ አዚናራ ጊፐ። አዚናይካ ባ ማቻ አንጂ ዬዶፎ።

12 ሃንኮ አሳሰ ቃሰ ታ ሃዝጋይሰ። ሄሳ ጊዛይካ ታና ኦቲን ጎዳ ጊዳና። አማኖንታ ማቻ ዲዛ አማኒዛዳይ ማቺያ ኢዛራ ዳና ዶሲኮ ኢዚ ኢዞ አንጃናሰ ቤሴና። 13 አማኖንታ አዚናይ ዲዛ

* 6:19 1ቆር 3:16፤ 2ቆር 6:16

አማኒዛ ማጫሲያ ሄ አማኖንታ አዚናይ ኢዚራ ዳናስ ኮይኮ ኢዛ ኢዛፔ እንጃታ ባናስ ቤሴና። 14 ጋሶይካ አማኖንታ አዚናይ አማኒዛ ባ ማቼዪን እንጃቴሰ። አማኖንታ ማጫሲያካ አማኒዛ ባ አዚናን እንጃታዉሰ። ሄሳሉ ሃናንታ አጊኮ ኢንቴ ዬሊዳ ናይቴ ቱናታ ጊዳና ሺን ሃዒ ቃስ እንጃቴዳይታ።

15 ጊዳ ኣቲን ናምዓፌ ኢሶይ አማኖንታዳይ ሻኬታና ኮይኮ ሻኬቶ። ኣዳ ጊዲን ማጫ ጊዲን አማኒዛዳይ ሄሳ ማላ ዋጋን ቃሹቴና። ያሲ ኑና ሳርን ዳና ማላ ያይጊዳሰ። 16 ሃኔ ኔኒ ኔ ኔ አዚና አሻናኮኔ ኣይ ኤራይ? ዋይኮ ሃይሶ ኔ ኔ ማቾ አሻናኮኔ ኣይ ኤራይ?

17 ጮ ኢሲ ኢሲ ኣሲ ያሲ ያይጊዳ ማላኔ ጎዳይ ዋሊዳ ማላ ዳዎ። ዋሳ ኬላታስ ታ ዋሊዛ ዋጋይ ሄሳ። 18 ኢሳዳይ አማናናፔ ካሴ ቃፃራቲዳዝ ጊዲኮ ቃፃራቶንታ ኣሳ ማላ ሃና። ቃስ ቃፃራቶንታ ዲሼ አማኒዳዳይካ ቃፃራቶፎ። 19 ቃፃራቲን ቃፃራቶንታ ኣጊን ናምዓንካ ጎዳይ ባዋ። ዋና ኣይፌ ዮጋይ ያሳ ኣዛዘ ፖሎ። 20 ኢሲ ኢሲ ኣሲ ባ ያይጊቲዳ ያይጊቲላን ማኒ ዳዎ። 21-22 አማኒዛ ዋዴ ኔ ኣይሌ? ኔ ሄሳስ ዳር ሜቶቶፓ፤ ዋዜታና ዳንዳዪኮ ዋዜታ። ጋሶይካ ኣይሌ ጊዲ ዲሼ ጎዳ አማኒዳዳይ ኢዚ ጎዳ ጎቃ። ሄሳሉካ አማኒዛ ዋዴ ጎቃ ጊዲንታዳይ ኢዚ ከርሰቶሳስ ኣይሌ። 23 ኢንቴ ሚሻን ሻሚቲዳታ። ሄሳ ጊሽ ኣሳ ኣይሌ ጊደፒቲ። 24 ታ ኢሻቶ! ኢንቴፌ ኢሲ ኢሲ ኣሲ ባ ያይጊቲዳ ማላ ያሳራ ማኒ ዳዎ።

ጌላዎታ፡ ፓንላታኔ አምዒታ ጊሽ ሸቁዳ ኣይሾ

25 ጌላዎታኔ ፓንላታ ጊሽ ታስ ጎዳፔ ኢሜቲዳ ኣዛዘይ ዳና። ጊዳ ኣቲን ጎዳ ማርቲላፌ ዳንዲዳይሳን ታ ኢንቴስ አማኔቲዳዳ ጊዳዳ ኢንቴና ዘራይሰ። 26 ሃይሳ ሃዒ ዋዴ ሜቶ ጋሶን ኢንቴ ሃዒ ዲዛ ማላ ዲዛኮ ታስ ሎጋ ሚሳቴሰ። 27 ኔ ማቼዳዳ ጊዲኮ እንጃናስ ኮዮፓ። ማቾንታዳ ጊዲኮ ማቾ ኤካናስ ኮዮፓ። 28 ማቾ ኤኪኮካ ናጋራ ጊዳና። ጌላዎያካ ጌሊኮ ናጋራ ጊዳና። ጊዳ ኣቲን ኤኪዛ ኣሳታኔ ጌሊዛይታ ቦላ ሃይሳ ኣላሜዛን ኢስታ ዳር ሜቶይ ጋካና። ታ ቃስ ሄሲ ኢንቴ ቦላ ጋኮንታ ኣጋናይሳ ዳሳይሰ።

29 ታ ኢሻቶ! ታ ቆፋይ ሃይሳ ማላ፤ ዋዴዚ ቃንሐ ጊዲዳ ጊሽ ማቻ ዲዛዳይ ማቻ ባይንዳዳ ማላ ዳዎ። 30 ዬኪዛይቲ ዬኮንታ ኣሳ ማላ፡ ኡፋዬቲዛይቲ ኡፋዬቶንታ ኣሳ ማላ ጊዳቶ። ሚሼ ሻሚዳዳንቲ ሻሚቲዳ ሚሻ ባስ ጊ ቆፖፌቶ። 31 ሃይሳ ኣላሜዛ

ሚሻን ጎዔተዘይቲ ወርሲ ጎዔቶንታ አሳ ማላ ጊዲ ዴቶ። ጋሶይካ ሃይሳ አላሜዛ ሃኖይ አቆናሰ ዴሰ።

32 እንቲ ሂርጋይ ባይንዳ ዳና ማላ ታ ኮያይሰ። ማቸንታዳይ ጎዳ ኡፋይሳናሰ ጎዳ ጊሽ ቆፔሰ። 33 ማቸዳዳይ ቃሰ ባ ማቸዮ ኡፋይሳናሰ ሃይሳ አላሜዛ ሚሽ ቆፔሰ። 34 ሃይሳን ኢዛ ቆፋይ ናምዑ ኬዚ ሻኬቲሰ። ጌሎንታ ማጫሳያ ዎይኮ ጌላያያ ጎዳዝ ፃላላ ቆፓዉሰ። ኢዚሰ ጌታ ቆፋይካ አሾኒካ፣ አያናንካ ጎዳሰ ዲማቲሳ። ጌሊዳራ ጊዲኮ ባ አዚና ኡፋይሳናሰ ሃይሳ አላሜዛ ሃኖ ፃላላ ቆፓዉሰ።

35 ታ ሄሳ ጊዛይ እንቲሰ ሎዓናዝ ቆፓዳፔ ኣቲን እንቲና ዳር ቆፋን ዬጋናሰ ጊዴና። ታሰ ጌታ ቆፋይ እንቲ ዎዝናይ ሻኬቲ ናምዑ ኬዘንታ እንቲ ጎዳን ሚኒዲ ዎጋራ ዴፖናናሳ።

36 አሳዳይ ባ ኦይቸዳ ጌላያዮ ዎጋራ ኦይኮንታ ኣጊኮ ኢዚ ዎዳይካ ጨሚ ጨሚ ቢኮ ኤካና ኮይኮ ባ ኮይዳ ማላ ኤኮ። ኤኪኮኔ ጌሊኮ ሎዎ። ናጋራ ጊዴና። 37 ጊዶ ኣቲን ሃይሳ ሃ ዮዎዛን ኢዛ ዎዝናይ ቃዎንታ ባና ሃሪዲ ጌላያዮ ኤኪኮ ጊዲ ሙርቲዳ ኣሲ ሎዎ ኦሊዴሰ። 38 ሄሳ ጊሽ ጌላያዮ ኤኪዳዳይ ሎዎ ኦሊዴሰ። ኤኮንታዳይካ አዴሳ ሎዎ ኦሊዴሰ።

39 ኢሲ ማጫሲ አዚናይ ፓፃ ዲዛ ዎዴ ኩሚላን ባ አዚናራ ቃሽታዲሰ። አዚናይ ሃይቁኮ ባ ኮይዳ አሰ ጌላና ዳንዲያዉሰ። ኢዛ ጌላናዳይ አማኒዛይ ጊዶ ኣቲን ጌሉ። 40 ታ ቆፋ ማላ ጊዲኮ ኢዛ ጌሎንታ ዲዛኮ ዳር ኡፋይሳን ዴዓንዲሰ። ታሰካ ታናን ያሳ አያናይ ዲዛ ሚሳቲሰ።

8

ኤቃሰ ያርሼቲዳ ኣሾ ሙሳ ጊሽ

1 ኤቃሰ ሹኬቲዳ ኣሾ ጊሽ እንቲ ታሰ ፃፊዳይሳ ማላ ጊዲኮ ቱሙካ ኑ ዉሪካ ኤሪዛ ሚሽ ዴሰ። ኤርይ ኦቶሪሴሰ፤ ሲቆይ ቃሰ ጎዔሰ። 2 ታ ኤራይሰ ጊዛ ኣሲ ኤራናሰ ቤሲዛ ማላ ቡር ኤሪሴና። 3 ያሴ ሲቁዛዳይ ጊዲኮ ኢዚ ያሳ ኣቻን ኤሬቲዳዴ።

4 ሄሳ ጊሽ ኤቃሰ ያርሼቲዳ ኣሾ ሙሳ ጊሽ ታ እንቲሰ ጊዛይ ሃይሳ አላሜዛን ኤቃይ ሃዳ ጊዲዳይሳኔ ኢሲ ያሳፌ ኣቲን ሃራ ያሲ ባይንዳይሳ ኑ ኤርሰ። 5-6 ኣይዴካ ጊዲኮ ዳር ኤቃቲኔ ዳር ጎዳቲ ዴቲሰ ሺን ሳሎን ጊዲን ሳዓ ቦሳ ያሴ ጌቲቲዛ ዳር ኤቃቲ ዲኮካ ኑሰ ጊዲኮ ሃኒዳይ ዉሪካ ኢዛን ሃኒዴሰ። ኑካ ኢዛሰ ጊዲዳ ኢሲ ያሲ ኣዎይ ዴሰ። ቃሴካ ሃኒዳዚ ዉሪካ ኢዛን

ሃሊዳይ ኑካ ኢዛን ሃሊዳ ኢሲ ጎዳይ ዩሱስ ኪርሰቶሲ ፃላላ ኑስ ዴስ።

7 ጊዶ አቲን ሃሳ አሲ ዉሪ ኤሬና። ኢሲ ኢሲ አሳቲ ሃኖ ጋካናስ ኤቃ ጎይኖ ዶሲዳ ጊሽ ሃሳ ማላ አሾ ሚሼ አዳካ ኤቃስ ሹኬቲዳይሳ ቆፔቴስ። ኢስታስ ቆፋይ ላፋ ጊዲዳ ጊሽ ኢስቲ ቱኔቴስ። 8 ጊዶ አቲን ካሌ ኑና ፆሳ አቶ ጋሌና። ኑ ሞንታ ኣጊኮካ ኑስ ፓጩዛይ ዴና። ኑ ሚኮካ ኑስ ዎጴይ ዴና።

9 ጊዶ አቲን ኢንቴ ሜቶይ ባዎ ጉሳን ኦሊዛይስ አማኖን ሚኖንታ አሳስ ቆጶ ጊዶንታ ማላ ናጌቲቴ። 10 ኔስ ሃሳ ሚሳቲዛ ኤራቴላ ዲዛ ጊሽ ሃንኮ አማኖን ሚኖንታይይ ኤቃ ኬላን ኔ ሚዛይሳ ቤዩዲ ኤቃስ ሹኬቲዳይሳ ማናስ ፃሌኔ? 11 ሃሳ ጊሽ ኪርሰቶሲ ኢዛ ጊሽ ሃይቂዳ ሄ አማኖን ሚኖንታ አሻይ ኔ ኤራቴላ ጋሶን ቆይስ ጉሳ። 12 ሃሳሶካ ኢንቴ ኢንቴ አሻታ ቆሆኒኔ ኢስታ ላፋ ቆፋ ማዲንሶን ኪርሰቶሳ ቆሃታ። 13 ሃሳ ጊሽ ታ ሚዛ ሚሺ ታ አሻ ቆጶዲዛዝ ጊዲኮ ታ አሻ ታ ቆጶሶንታ ማላ ሙሌካ አሾ ሚኬ።

9

ሃዋሬታስ ዲዛ ማታ

1 ታኒ ጎቃ አስ ጊዲኪና? ታ ሃዋሬ ጊዲኪና? ኑ ጎዳ ዩሱሳ ታኒ ታ አይፌራ ቤያቤኪና? ኢንቴካ ጎዳን ታ ኦሶን ቤቲዳ አይፌ ጊዴኬቲ? 2 ሃራታስ ታ ሃዋሬ ጊዶንታ ኣጊኮካ ታ ኢንቴስ ቱማፔ ሃዋሬ። ጋሶይካ ጎዳን ታ ሃዋሬቴላ ቤሲዛ ማታሜይ ኢንቴና።

3 ታና ፓጩዛይታስ ታ ኢሚዛ ማልሌይ ሃሳ። 4 ኤር! ማናሲኔ ኡያናስ ኑስ ቤሴኔ? 5 ሃራ ሃዋሬታ ማላ ጎዳ አሻታ ማላኔ ኬፋንታ ማላ ኑካ አማኒዛ ኑ ማቼታ ኤኪ ዩያና ዳንዳዮኮኒ?

6 ዎይኮ ዎይቲ ዳቡሪዲ ዳናስ ቤሲዛይ ታናኔ ባርናባሳ ፃላላ?

7 ኤር! ባ ሚሻራ ዎታዳራቴላ ኦሊዛይ ኦኔ? ዎይኔ ሚሊ ቶኪዲ፣ ሄ ቶኪዳ ሚላ አይፌ ሞንታይ ኦኔ? ሜሄ ሄሚሼ ባ ሄሚዛ ሜሄዛ ማላ ኡዮንታይ ኦኔ?

8 ታ ሃይሳ ጊዛይ ጮ አሳ ቆፋ ማላ ፃላላ? ሙሴ ዎጋይ ሃሳሶ ጌኔ? 9 ሙሴ ዎጋ ጋርሳን “ካላ ቡኪዛ ሜሄ ዲና ቃቾፋ” ጌቲቲ ፃፌቲዴስ። ሂስቲን ፆሴ ሜቲዳይ ሄ ሜሄዛ ቃንሌ? *

10 ኢዚ ሃሳ ጊዳይ ቱማፔ ኑ ጊሽ ጊዴኔ? ሂሲ ፃፌቲዳይ

* 9:9 ዛሬ 25:4፤ 1፻፵ 5:18

አዳሬ ኑ ገሻሳ። ጎሻንቻይኔ ቃሴካ ቡኪዛይሲ ባ ኦሶ አይሬፔ ባና ጋኪዛይሳ ኤካናሰ ኡፋይሰ ኦሌሰ።

11 ኑ ኢንቴ ጊደን አያና ዜሬሌ ዜሪዳይቲ አሾሰ ጊዲዛዝ ማደኮ ሄሲ ገታ ሚሼ? * 12 ሃራ አሳቲ ኢንቴሬ ሄሳ ማላ ጎዳ ኤካናሰ ዳንዳዪኮ ኑ ቃሰ ሄሳሬ ዳሮ ዳማናሰ ቤሴኔ? ጊደ አቲን ኑኒ ኑሰ ቤሲዛ ማላ ጎዴቲቤኮ። ሃራፔካ ኑ ኪርሰቶሳ ሚሽራቾ ቃላሰ ጳጳ ጊደንታ ማላ ሃኒዛዝ ወርሲካ ዳንዳዮሰ። 13 ያሳ ኬላን ኦሌዛይቲ ባ ማናይሳ ያሳ ኬላሬ ኤኪዛይሳ ማላ ያርሾሶን ኦሌዛይቲካ ሄ ባ ኦሌዛ ያርሽዛይሳሬ ሚዛይሳ ኢንቴ ኤሬኬቲ? * 14 ሄሳሶካ ሚሽራቾ ቃላ ሳባኪዛይቲ ባሲ ኮሽዛይሳ ሚሽራቾ ቃላ ኦሌዛሶፔ ኤካና ማላ ጎዳይ ዋጋ ዋሌዳሰ። *

15 ታኒ ጊዲኮ ሄሳ ኡባሬካ አይኮካ ጎዴታቤኬ። ሃዲካ ታ ኢንቴሰ ሃይሳ ያፊዛይ ሄይታንታ ማላ ሚሽ ታሰ ኦሌቶ ጋዳ ጊዴና። አይሲ ጊኮ ኦኒካ ታኒ ታ ጎዳን ጨቁቲዛር ታፔ ዋሌ ኤካናፔ ታሰ ሃይቆይ ሎዎ። 16 ሚሽራቾ ቃላ ሳባኪዳይሲ ታና ጨቁሴና። ታ ሳባኪዛይ ደሳን ጊዲዳ ጊሽ ጊደንታ ዋልቃራ ታና ጋኪዳ ገሻሳ። ታ ሚሽራቾ ቃላ ሳባኮንታ አጊኮ ታና አዬ-አና! 17 ሚሽራቾ ቃላ ታ ደሳን ታ ሳባኪኮ ታሰ ዋይቶይ ዳሴ። ታኒ ታ ደሳን ጊደንታ ዋልቃራ ኦሌዛይሳ ጊዲኮ ሃዳራ ፖላና ማላ ኦሶ ያላላ ጊዳና። 18 ሂሰቲን ታሰ አዛ ዋይቶይ ዲዜ? ታሰ ዋይቶይ ዳናይ ሚሽራቾ ቃላ ሳባካሼ ታሰ ቤሲዛይታ ታ ጎዴቶንታ አጊኮኮ።

19 ታ ጎቃፔ አቲን ኦናሰካ አይሌ ጊዲኬ። ጊደ አቲን ዳርታ ጎዳኮ ዛራና ጊሽ አሳ ኡባሰ አይሌ ማላ ጊዳዲሰ። 20 አይሁዳታ አሻናሰ አይሁዳታራ ኢሰታ ሚሳታዲሰ። ታኒ ታ ባጋራ ሙሴ ዋጋፔ ጋራሳራ ጊደንታ ዳሼ ሙሴ ዋጋፔ ጋርሳራ ዲዛይታ አሻናሰ ኢሰታ ሚሳታዲሰ። 21 ታኒ ታ ባጋራ ያሳ ዋጋይ ዲዛዴኔ ኪርሰቶሳ ዋጋሰ ሃራቲዛዴ ጊዲኮካ ዋጋይ ባይንዳይታ አሻናሰ ኢሰታ ማላ ዋጋይ ባይንዳዴ ጊዳዲሰ። 22 ዳቡራንቻታ አሻናሰ ጋዳ ታካ ዳቡራንቻታራ ኢሰታ ማላ ዳቡራንቻ ጊዳዲሰ። ታሰ ዳንዳዬቲዳ ማላ ኡባን ኢሲ ኢሲ አሳታ አሻናሰ አሳ ኡባራ ኢሰቲ ሃኒዛዝ ሃናዲሰ። 23 ታ ሃይሳ ወርሳ ኦሌዛይ ሚሽራቾ ቃላ አንጆ ኢሰታራ ጊሼታናሰ ሚሽራቾ ቃላ ጊሽ ኦላዲሰ።

24 ጋዴ ዋሌ ዋዳዛይቲ ዳር ሺን ያኒዲ ሺልማቲ ዴሚዛይ ኢሳዴ ያላላ ጊዲዳይሳ ኢንቴ ኤሬኬቲ? ሄሳ ጊሽ ሺልማቲ

* 9:11 ኦር 15:27 * 9:13 ዛሬ 18:1 * 9:14 ማቶ 10:10፤ ሉቃ 10:7

ኤካናስ ዋዲዳ ማላ ኢንቴካ ዋዲቴ። 25 ጋዴን ዋዲ ኣጳናስ ጊጌቲዳይ ኦኒካ ሃኖ ባርካ ባና ናጌሰ። ሄይታንቲ ኣጳናኔ ጳያና ኣክሊሌ ኤካናስ ዳቡሬቴስ ሺን ኑ ቃስ ሜርናስ ጳዮንታ ኣክሊሌ ዴማናስ ዳቡርሰ። 26 ሄሳ ጊሽ ታ ቃስ ፖሎይ ባይንዳ ጮ ማላ ዋዲዳ ማላ ዋዲኬ። ቃሴካ ጫርኮራ ባዲቲዳ ማላ ጮ ማላ ጋዴን ባዲቲኬ። 27 ታ ቃስ ሃራታስ ሳባካ ፔዳዳ ታስ ኩንዳ ኣቶንታ ማላ ታ ኣሳቴል ሺሻ ኦይካዳ ሃራይሰ።

10

ኢስራዔል ናይታ ቦላ ጋኪዳይሲ ጋኮንታ ማላ ናጌቴል

1 ታ ኢሻቶ! ካሴ ኑ ኣዋቲ ሻራይ ኢስታፌ ቦላራ ጊዲዲ ካሌሊዳይሳ ማላኔ ኢስቲ ወሪካ ዘዖ ኣባ ፒኒዳይሳ ታ ኢንቴና ቆፕሳናስ ኮያይሰ። * 2 ኢስቲ ሙሴራ ጊዳናስ ጊዲ ሻራኒኔ ኣባን ፃማቂቲዳ። 3 ወሪካ ኢሲ ኣያና ቁማ ሚዳ። * 4 ወሪካ ኢሲ ኣያና ኡሺ ኡዪዳ። ኢስቲ ኡዪዳይካ ባና ካሊዛ ኣያና ዛላፌ ፑልቲዳይሳ። ሄ ዛላይካ ኪርሰቶሳ። * 5 ጊዳ ኣቲን ዖሲ ዳርታን ኡፋዬቲቤና። ሄሳ ጊሽ ኢስታ ኣሃይ ባዞን ኩንዲ ኣቲዳስ። *

6 ኢስቲ ኢታ ሚሽ ኣሞቲዳይሳፉ ኑካ ኣሞቶንታ ማላ ሄ ኢስታ ሃኖይ ኑ ናጌታና ማላ ኑስ ለሚሶ ጊዲዳስ። * 7 “ዳሬይ ማናሲኔ ኡያናስ ኡቲዳስ፤ ዩፃናሰካ ዴንዲዳስ” ጌቴቲ ካሴ ጌሻ ማፃፋን ፃፌቲዳ ማላ ኢስታ ጋርሳፌ ኢሲ ኢሲ ኣሳቲ ኦሶይሳፉ ኢንቴካ ኤቃ ጎይኒዛያታ ጊዳፕቴ። * 8 ኢስታ ጋርሳፌ ኢሲ ኢሲ ኣሳቲ ላይማቲዲ ኢሲ ጋላስ ናሞዑ ታማኔ ሄሹ ሺ ኣሳይ ዲፒ ጊ ወርይሳፉ ወርንታ ማላ ኑካ ኣኔ ላይማቶኮ። * 9 ኢስታ ጋርሳፌ ኢሲ ኢሲ ኣሳቲ ጎዳ ፓጩዲ ሾሻን ዲኬቲ ሃይቂ ጳዪዳይሳ ማላ ኑካ ኣኔ ጎዳ ፓጩኮ። * 10 ኢስታ ጋርሳፌ ኢሲ ኢሲ ኣሳቲ ዙዙማቲዲ ጳይሲዛ ቦሻ ኪታንቻን ጳዪዳይሳፉ ኢንቴካ ጳዮንታ ማላ ዙዙሞፕቴ። *

11 ሄሲ ወሪ ኑስ ለሚሶ ጊዳና ማላ ኢስታ ቦላ ጋኪዳስ። ዋዲ ወርሴላን ዲዛ ኑስ ቲሚርቲ ጊዳና ማላ ኑስ ፃፌቲዳስ። 12 ሄሳ ጊሽ ታ ሚና ኤቃ ዳይሰ ጊዛይይ ዲኮ ኩንዳንታ ማላ ባሲ

* 10:1 ኬሳ 13:21-22፤ 14:22-29 * 10:3 ኬሳ 16:35 * 10:4 ኬሳ 17:6 * 10:5 ታይ 14:29-30 * 10:6 ታይ 11:4 * 10:7 ኬሳ 32:6 * 10:8 ታይ 25:1-18 * 10:9 ታይ 21:5-6 * 10:10 ታይ 16:41-49

ናገሩ። 13 እሳ ቦላ ጋኪዳ ፓጩፔ ሃራ ኣጲዛ ፓጩይ እንቲ ቦላ ጋኪቤና። ያሲ ኣማኔቲዛ ያሴ ጊዲዳ ጊሽ እንቲ ዳንዳዮንታ እንቲ ዋልቃፌ ቦላራ እንቲ ፓጩፔና ማላ ኢዚ እንቲና ኣጋገና። ጊዶ ኣቲን እንቲ ፓጩፔቲዛ ዋዴ ሄ ፓጩዛ እንቲ ዳንዳያና ማላ ዋልቃ ኢሚዲ ፓጩፔ እንቲ ከሲ ኤካና ኦጌ ኢዚ እንቲሰ ጊጊሳና።

ኤቃራ ኢሲፌቴሌ ዳናሰ ቤሴና

14 ሄሳ ጊሽ ታ ሲቆቶ! ኤቃሰ ጎይኖፒቴ፤ ኢዛፔ ሃኪቲ። 15 ታ እንቲሰ ሃይሳ ጊዛይ ዋዝናማ ጊዲዳ ጊሻሳ። ሄሳ ጊሽ ታ ዮቲዛይሳ ኣኔ እንቲ እንቲርካ ፒርዲቲ። 16 ኦኒ ያሳ ጋላቲዲ ኤኪዛ ኡሻይ ከርሰቶሳ ሱላራ ጋጎቴሌ ዲዛይሳ ጊዴኔ? ሄሳቶካ ኑ ባሌ ባሌ ጊሹቲ ሚዛ ኡኤላይ ከርሰቶሳ ኣሾራ ጋጎቴሌ ዲዛይሳ ጊዴኔ? * 17 ኡኤላይ ኢሲኖ ጊዲዳ ማላ ኦኒካ ዳር ጊዲ ኡቲዲካ ዉሪካ ኢሲ ኣሾ። ኑ ዉሪካ ኢሲ ኡኤላዛ ጊሹቲ ዋሶ።

18 ኣኔ እንቲ ኢሰራዔሌ ናይቲ ኦሌዳይሳ ቆፒቴ። ሸቅዛ ያርሾዛፔ ሚዛይታሰ ያርሾይ ሸቅዛሶራ ጋጎቴሌ ዴኔ? * 19 ሂሰቲን ኤቃሰ ያርሹቲዳ ያርሾ ጊዲን ዋይኮ ኤቃይ ባ ባጋራ ጎዓራ ዴሰ ጋዚና? 20 ጊዴና! ኣማኖንታ ኣሳይ ሸሺዛ ያርሾይ ያሳሰ ጊደንታ ያላዔሳ። እንቲሰ ያላዔራ ኢሲፌቴሌ ዳና ማላ ታ ኮዩኬ። * 21 ያላዔ ኡሺኔ ጎዳ ኡሺ እንቲ ኢሲፌ ጋሌ ኡያና ዳንዳይኬታ። ጎዳ ማዳፌኔ ያላዔ ማዳፌ ጋሌ ማና ዳንዳይኬታ። 22 ኦኒ ጎዳ ሃንቁሌኖ? ኑ ኢዛፔ ሚኒዛኒ? *

ኡባካ ያሳ ቦንቾሰ ኦሶ

23 ዉሪካ ታሰ ኢሚቲዴሰ ሸን ዉሪካ ታና ጎዒዛዝ ጊዴና። ዉሪካ ታሳ ሸን ዉሪካ ታና ማዴና። * 24 ኣሲ ዉሪካ ባ ላጌ ጎዳናዝ ጋሌ ዪሎ ኣቲን ባና ጎዳናዝ ያላላ ኮዮፖ። 25 ጊያን ባይዜቲዛ ኣሾ ዉርሲ ሲጴይ ባይንዳ ሚቴ። 26 ቢታይኔ ቢታ ቦላ ዲዛይ ዉሪካ ጎዳይሳ። 27 ኣማኖንታ ኣሲ እንቲና ባሶ ዪይጊዲ ሸሸዳ ካል ዉርሲ ኣይኮካ ሲጴንታ ሚቴ። 28 ጊዶ ኣቲን ኢሳዴይ “ሃይሲ ኤቃሰ ያርሹቲዳ ካሳ” ጊኮ ሄ ካሳ ሄ ኣዴዛ ቆፋ ጊሺኔ እንቲና ሲጲሲኮ ሞፒቴ። 29 ታ እንቲሰ ሄሳ ጊዛይ ሄ ዮቲዳዴ ቆፋ ጊሽ ጋዲሰ

* 10:16 ማቶ 26:26-28፤ ማር 14:22-24፤ ሉቃ 22:19-20 * 10:18 ሉዌ 7:6 * 10:20 ዛሬ 32:17 * 10:22 ዛሬ 32:21 * 10:23 1ቆር 6:12

አትን አንቲ ቆፋ ገሽ ጋቤይኬ። ታ ዲሎ ገዳ ዲሺን አዛሰ ሃራ አሳ ቆፋ ጌዶን ታ ቦላ ፐርዳቲዜ? ³⁰ ታ ያሴ ጋላታዳ ሚዛይ ገዳ ኡታዳ አዛሰ ሃራ አሳን ፐርዳቲ?

³¹ ሂሰቲኮ አንቲ አይ ሚኮካ፣ አይ ኡዩኮካ ዋይኮ አይኮ ኦሊኮ ወርሲካ ያሳ ቦንቸሰ ኦሊቴ። ³² አይሁዳ አሳሰ ገዲን አይዛቤታሰ ገዲን ዋይኮ ያሳ ዋሳ ኬላሰ ኦናሰካ ቆጶ ገደፒቴ። ³³ ታ አሰ ወርሳካ አይ ኦጌራካ ኡፋይሳና ኮዩዛ ማላ አንቲካ ሄሳላ ኦሊቴ። ዳሮቲ አታና ማላ ታ ታና ጎሲዛዝ ገደንታ ኢሰታ ጎሲዛዝ ኮያይሰ።

11

1 ታኒ ኪርሰቶሳ ሚሳታዳ ኢዛ ካሊዛይሳላ አንቲካ ታና ሚሳቲዲ ካሊቴ። *

ያሳ ጎይኖ ዋጋ

2 አንቲ ታሰ ወርሲ ቆፒዛ ገሺኔ ታፔ ኤኪዳ ቲሚርቲዛ ሎዔሊ ይይኪዳ ገሽ ታ አንቲና ጋላታይሰ። ³ ገደ አትን ታ አንቲ ኤራና ማላ ኮዩዛይ አቱማሳሰ ኡባሰ ሁዔይ ኪርሰቶሳ ገዲዳይሳ ማላ አቱማሳይ ማጫሳሰ ኡባሰ ሁዔ። ቃሴ ያሲ ኪርሰቶሳሰ ሁዔ። ⁴ ባ ሁዔ ጉሉንቲዲ ያሴ ዋሲዛይይ ዋይኮ ቃላ ዮቲዛይይ ኦኒካ ባርካ ባና ካወሺሰ።

⁵ ባ ሁዔ ጎዘንታ ዋሲዛ ማጫሲያ ዋይኮ ቲንቤቲ ቃላ ዮቲዛ አይ ማጫሰካ ባርካ ባና ካወሻወሰ። ሄሲ ኢዛ ባ ሁዔ ቡሊሲዳዳራ ገና። ⁶ ማጫሲ ባ ሁዔ ጎዘንታ አጊኮ ሜዳቲ ዋይኮ ቃንዲሰ። ኢዚሰ ባ ሁዔ ሜዳቲሊ ዋይኮ ቃንዲሰሊ ዩላቸዛዝ ገዲኮ ጎዙ። ⁷ አዳይ ባ ሁዔ ጉሉንታናሰ ቤሴና። አቱማሲ ያሳ ለሚሶኔ ያሳ ቦንቸ። ማጫሲ ገዲኮ አዳሰ ቦንቸ። * ⁸ ጋሶይካ ማጫሲ አዳፌ ሜዳታዲሰ አትን አቱማሲ ማጫሳፔ ሜዳቲቤና። ⁹ ቃሴካ ማጫሲ አዳሰ ሜዳታዲሰ አትን አዳይ ማጫሳሰ ሜዳቲቤና። ¹⁰ ሄሳ ገሽ ኪታንቻቲ ቤያናሰ ናጊዛ ማጫሳሰ አሚቲዳ ማታ ቤሲዛ ጎሴ ባ ሁዔን ጎዙ።

¹¹ ጎዳ አቻን ገዲኮ ማጫሲ አዳይ ባይንዳ፣ አዳይካ ማጫሲ ባይንዳ ዳይቴና። ¹² ማጫሲ አዳፌ ቤቲዳይሳላ አዳይካ ማጫሳፔ ዩሌቴሰ። ገደ አትን ናምዳይካ ያሳፌ ቤቲዳ።

¹³ ማጫሲ ባ ሁዔ ጎዘንታ ያሴ ዋሳናሰ ቤሲዛኮኔ ኦኔ አንቲ ፐርዲቴ። ¹⁴ አቱማሲ ባ ሁዔ አዲሲ ዲቸኮ ቦርሶ ገዲዳይሳ

* 11:1 1ቆር 4:16፤ ፒሊ 3:17 * 11:7 ሜዴ 1:26-27

አንቲና ሜዴቴላ ሃኖቴሌ ኤሪሱዌ? 15 ማጫይ ጊዲኮ ባ ሁዔ ቢናና ዲቺኮ ሄሲ ኢዚሰ ቦንቾ ጊዴኔ? ኢዚሰ አዲሳ ሁዔ ቢናናይ አሜተዳይ ሴሎ ጊዳናሳ። 16 ሄሳ ጊሽ ኦኒካ ሃይሳ ሃ ዮዖዛን ፓላሜታና ኮይኮ ኑሰ ጊዲንካ ያሳ ዋሳ ኬላታሰ ሃይሳፊ ሃራ ዋጋይ ዳና።

ጎዳ ካዎ ኤኮ ዋጋ

17 አንቲ ኢሲ ሶ ሺቁቴዛ ዋዴ ቆሆሰ አቲን ጎዳሰ ጊደንታ ጊሽ ታ ሃይሳ አዛዘዛ አንቲሰ አሌዛይ አንቲና ጋላታሼ ጊዴና። 18 አንቲ ዋሳ ኬላን ሸቁዛ ዋዴ አንቲ ጋርሳን ሻኮቴሌ ዲዛይሳ ታ ካሴታ ሲያዲሰ። ታ ሲዮይሳፊ ባጋይ ቱሙ ጊዳናይሳ ታ አማናይሰ። 19 አንቲ ጊደፊ ቱማንቻቲ ሻኬቲ ኤሬታና ማላ ሄሳ ማላ ሻኮይ አንቲ ጊደን ዳናይሲ ዶሳ ጊዴና። 20 አንቲ ኢሲፊ ሸቁቴዲ ሚዛይ ጎዳ ካዎ ጊዴና። 21 አንቲ ሸቁቴዲ ኢሶይ አሳ ናንጎታ ዲሼ ካላ ማታ። አንቲፊ አሳዴይ ጋፋን ዲሺን ሃንኮይሲ ቃሰ ማሶቴሰ። 22 ሂሰቲን አንቲሰ ኡያናሶይኔ ማናሶይ ባዌ? ዋይኮ ያሳ ኬሌ ለቁዲ አይኮይካ ባይንዳይታ ዌላቸቲ? ሂሰቲን ታ አንቲና አይ ጎ? ሃይሳ ሃ ሃኖዛሰ አንቲና ጋላቶ? ሙሌካ ጋላቲኬ።

23-24 ታ ጎዳፕ ኤኪዲይሳ አንቲሰ አላዲሰ። ሄሲካ ጎዳ ዌሱሲ አጂ አሜተዳ ኦማርሰ ኡኬሌ ዳንሊዲኔ ያሴ ጋላቲ ባሊዲ “ሄዶቴ! ማቲ! ሃይሲ አንቲሰ ጊዲዛ ታ አሾ። ታና ቆፓናሰ አንቲ ሃይሳ አሊቲ” ጊዴሰ። 25 ሄሳሶካ ካዎፔ ጉዌ ኡሻ ዳንሊዲ “ሃይሲ ኡሻይ ታ ሱላን ሃኒዛ ኦራላ ጫቆ። ሄሳ ጊሽ ኡሻፊ አንቲ ኡዩዛ ዋዴ ሃይሳ ታና ቆፓና ማላ አሊቲ” ጊዴሰ። *

26 ሃይሳ ኡኬላ አንቲ ሚዛ ዋዴኔ ሃይሳ ኡሻካ ኡዩዛ ኡባ ዋዴ ጎዳይ ያና ጋካናሰ አንቲ ኢዛ ሃይቆ ዮታና። 27 ሄሳ ጊሽ ኦኒካ ቤሶንታ ዲሺን ሃይሳ ኡኬላ ሚኮ ዋይኮ ጎዳ ኡሻ ኡዩኮ ኢዛዴይ ጎዳ አሾኔ ኢዛ ሱላ ካወሺዳ ጊሽ ኢዚ ኦይሼታና። 28 ኦኒካ ሃይሳ ሃ ኡኬላ ማናፔኔ ኡሻፊ ኡያናፔ ካሴቲ ባርካ ባና ፓጮ። 29 ጋሶይካ ኦኒካ ጎዳ አሾ ባሲ ጌሎንታ ዲሺን ሚኮኔ ጎዳ ኡሻ ኡዩኮ ኢዛዴይ ባርካ ባ ቦላ ፐርዳ ኤሄሰ። 30 አንቲ ጋርሳን ዳር አሳይ ዳቡሪዳይኔ ሳኬቲዳይ ቃሴካ ባጋይ ሃይቁዳይ ሄሳ ጋሶና። 31 ኑ ኑርካ ኑና ፓጪዛኮ ኑ ቦላ ፐርዳና። 32 ጊደ አቲን ጎዳይ ፐርዲዛ ዋዴ ኑ ሃንኮ አማኖንታ አሳራ ፐርዴቶንታ ማላ ኢዚ ኑና ካሴቲ ሙሬሰ።

* 11:25 ኬሳ 24:8፤ ኤር 31:31-34

33 ሄሳ ጊሽ ታ ኢሻቶ! ኢንቴ ማና ሸቁዛ ዎዴ ኢሶይ ኢሳራ ናገቴቲ። 34 ኢንቴ ሸቁዛ ሸቆይ ፒርዳስ ጊደንታ ማላ ኢንቴፊ ኢኒካ ጋፊዳዴይ ዲኮ ካሴቲዲ ባ ሶን ሞ። ሃንኮ ኣቲዳይሳ ታኒ ሃራ ዎዴ ሄ ኢንቴኮ ባዳ ዎጋ ዎላና።

12

ዲሎ ኣያና ኢሞታታ

1 ታ ኢሻቶ! ኣያናይ ኢሚዛ ኢሞቴላ ጊሽ ኢንቴ ኢሲ ሚሽ ኤራና ማላ ታ ኮያይሰ። 2 ኢንቴ ኣማናናፔ ካሴ ጮ ማላ ያኔ ሃኔ ጉሳን ኢንቴ ኤሮንታ ካሌጱቲዲ ዲና ዲዴ ጊዲዳ ኤቃታኮ ቢዳይሳ ኢንቴካ ኤሬታ። 3 ሄሳ ጊሽ ኦኒካ ያሳ ኣያናን ሃሳዪሾ “ዬሱሲ ቃንጌቲዳዴ” ጌና። ሄሳጱካ ዲሎ ኣያናን ጊዲዲ ኣቲን ኦኒካ “ዬሱሲ ጎዳ” ጋና ኢሲ ደንታይሳ ታ ኢንቴሰ ዮታይሰ።

4 ኣሳሰ ኢሞቴላ ዲማ ዲማ ጊዲሺን ኣያናይ ጊዲኮ ኢሲኖ። 5 ኦሶይካ ዲማ ዲማ ጊዲሺን ጎዳይ ጊዲኮ ኢሲኖ። 6 ዲማ ዲማ ኦሶ ኦጌቲ ዲኮካ ወርሲካ ኦሊዛይ ኢሲ ያሳ።

7 ጊዶ ኣቲን ዲሎ ኣያና ቆንጨሶ ኢሞታይ ኢሳዴሰ ኢሚቴዛይ ኢሲፊ ጎዔታናሳ። 8 ኢሳዴሰ ሃላን ሃሳያና ኤራቴላ ኢሚቴሰ። ሃራ ኣሳሰ ቃሰ ሄ ኣያናንካ ኤራቴላ ቃላን ሃሳያና ቃላይ ኢሚቴሰ። 9 ኢሳዴሰ ሄ ኣያናን ኣማናይ ኢሚቴሰ። ሃራ ኣሳሰ ቃሰ ሄ ኣያናንካ ሃርጊዛይታ ፓሊዛ ኢሞታይ ኢሚቴሰ። 10 ኢሳዴሰ ማላሊሲዛ ኦሶ ኦሊዛ ኢሞታይ፤ ቃሴካ ሃራ ኣሳ ቡሮ ቲንቢቲ ቃላ ሃሳያ ኢሞታይ፤ ሃራ ኣሳ ቃሴካ ኣያናታ ሻኪ ኤሮይ፤ ሃራ ኣሳሰ ዲማ ዲማ ቃላን ሃሳያይ፤ ቃሴካ ሃራ ኣሳሰ ሃራ ዲማ ዲማ ቃላን ሃሳዬቲዳይሳ ቢርሻና ኢሞታይ ኢሚቴሰ። * 11 ሄይቲ ወሪካ ሄ ኢሲ ኣያናይ ኢሚዛ ኢሞታ ጊዲሺን ኢሲ ኢሲ ኣሳሰ ባ ኮይዳ ማላ ኢሚሰ።

ኢሲ ኣሳቴላ ቦላ ዲማ ዲማ ቢሊቴቲ ዴቴሰ

12 ኢሲ ኣሳቴላ ቦላ ዳሮ ቢሊቴቲ ዲኮካ ኣሳቴላይ ኢሲኖ። ጊዶ ኣቲን ቢሊቴቲ ዳሮ ጊዲኮካ ኣሳቴላይ ኢሲኖ ዓላላ። ከርሰቶሲካ ሃሳ ማላ። * 13 ኣይሁዳ ኣሳታ ጊዲንካ ጌሪኬ ኣሳታ ጊዲንካ። ኣይሌ ጊዲንካ ዎይኮ ጎቃ ኣሳታ ጊዲንካ ኦ ወሪካ ኢሲኖ ጊዳሰ ኢሲ ኣያናን ፃማቁቴዳሰ። ኦ ወሪካ ሃ ኢሲ ኣያናፔ ኡዱደሰ።

* 12:10 ቲንቢቲ ቃላ ያሳ ቃላ ቢርሻላ ዎይኮ ቆንጨሰ ዮቶ። * 12:12 ኦር 12:4-5

14 አሳቴሌ ሜዴቲዳይ ዳር ቢሊቴታፔ ኣቲን ኢሲ ቢሊቴፔ ፃላላ ገደና። 15 ቶሆይ “ታ ኩሼ ገደንታ ገሽ አሳቴላ ገደን ዲኬ” ገኮ ኢዚ ሂዘገዳ ገሽ ኢዛሰ አሳቴላን ዱሲ አታኔ? 16 ሃይሌ “ታ አይፌ ገደንታ ገሽ አሳቴላ ገደን ዲኬ” ገኮ ሄሳ ገሽ አሳቴላ ገደን ዱሲ ኢዛሰ አታኔ? 17 አሳቴሌ ወሪካ አይፌ ፃላላ ገደዲዳኮ አዛን ሲያኔ? አሳቴሌ ወሪካ ሃይሌ ፃላላ ገደዲዳኮ አዛን ሲንጋኔ? 18 ገደ ኣቲን ፆሲ ኢሳ ኢሳ ባ ኮይዳ ማላ አሳቴላ ገደን ዳናሰ ቤሲዛሶን ዋሊደሰ። 19 ቢሊቴይ ወሪካ ኢሲኖ ገደዲዳኮ ኩሜላ አሳቴሌ አዋፔ ቤታኔ? 20 ሄሳ ገሽ ቢሊቴቲ ዳር ሽን አሳቴሌ ገደዲኮ ኢሲኖ ፃላላ።

21 አይፌይ ኩሼ “ኔና ታ ኮዩኬ” ጋናሰ ዳንዳዬና። ሁዔይ ቶሆ “ኔና ታሰ ኮሼና” ጋና ዳንዳዬና። 22 ሃራይ አቶሽን ኡባፌ ላፋ ሚሳቲዛ ቢሊቴቲ ዳር ኮሺዛይታ። 23 ኦኒ ላፋ ገ ለቂዛ ቢሊቴታ ሃንኮይታፔ አሊ ቦንቾሰ። ቃሴካ ኑ ኢሰታን ዬላቲዛ ቢሊቴታ ሃራፔ አሊ ናሳሰ። 24 ኑ ኢሰታን ዬላቶንታ ቢሊቴታሰ ገደዲኮ ሄሳ ማላ ቦንቾ ኮሼና። ፆሲ ገደዲኮ አሳቴላ ቢሊቴታ ኢሲ ቦላ ኦይሌሊዲ ቦንቾይ ፓፎዛይታሰ አዴላ ቦንቾ አሚደሰ። 25 ኢዚ ሄሳ ኦሊዳይ አሳቴላ ቢሊቴታ ጋርሳን ሻኮቴሌ ደንታ ኢሰቲ ባ ጋርሳን ኢሶይ ኢሳ ባናራ ገና ገ ቆፓናሳ። 26 ኢሲ ቢሊቴይ ሳኬቲኮ ሃንኮ ቢሊቴቲ ወሪካ ኢዛራ ኢሲፌ ሳኬቴሰ። ኢሲ ቢሊቴይ ቦንቾቲኮ ቢሊቴቲ ወሪካ ኢሲፌ ኡፋዬቴሰ።

27 ሂሰቲኮ ኢንቴ ወሪካ ከርሰቶሳ አሳቴላ፤ ኢንቴ ኢሶይ ኢሶይ ኢዛ አሳቴላ ቢሊቴታ። 28 ፆሲ ዋሳ ኬላ ገደን ኮይር ሃዋሪታ፣ ናምዓንሶ ቃሴ ናቤታ፣ ሃቫንሶ አሰታሚሬታ፣ ካሌሊዲ ማላታ ኦሊዛይታ፣ ፓሊዛ አሞቴሌ ዲዛይታ፣ ሃራታካ አሰ ማዲዛ አሞታይ ዲዛይታ፣ ዳሪ አይሶ ኤራቴሌ ዲዛይታኔ ዲማ ዲማ ቃላ ሃሳያና አሞቴሌ ዲዛ አሳታ ዋሊደሰ። 29 ወሪካ ሃዋራቴ? ወሪካ ናቤቴ? ወሪካ አሰታሚሬቴ? ወሪካ ማላሊሲዛ ሚሼ ኦሊዛ? 30 ኡባሰካ ሃርጊዛይታ ፓሊዛ አሞታይ ዲዜ? ኢሲ ወሪካ ዲማ ቃላን ሃሳዩዜ? ዲማ ቃላን ሃሳዩቶይሳ ኢሲ ወሪ ቢርሺዜ? 31 ገደ ኣቲን ኢንቴ ወሪካ ኡባፌ አዲዛ አሞቴላ ሎዔሌ ኮዩቴ። ቃሴካ ሃራ ኡባፌ አዲዛ ኦጌ ታ ኢንቴና ቤሳና።

13

ቱሙ ሲቆ

1 ታ አሳ ቃላኒኔ ሳሎ ከታንቻታ ቃላን ሃሳዩኮካ ታሰ ሲቆይ ባይንዳ አገኮ ጮ ሜላ ቢራታ ገሪሳ ማላ ዋይኮ ዳላ ገራላ

ማላ። 2 ቲንቢቴ ሃሳዬዛ አሞታይ ታስ ዲኮካ፣ ዋይኮ ፀራ ዮዖታኔ ኤራቴል ወርሳ ታ ኤሪኮካ፣ ዙማይ ኢዚ ዲዛሶፔ ቶቃዳ ሃራሶ ዲጊዛ አማኖይ ታስ ዲኮካ ሃሳ ወርሳካ ሲቆይ ባይንዳ ታ አሊኮ ሄሲ ማላ ሃዳ። * 3 ታስ ዲዛዝ ወርሳ ማንቆታስ ታ አሚኮካ፣ ታ አሳቴል ታ ታማን ፀጊኮካ፣ ሲቆይ ባይንዳ አጊኮ ታና ሄሲ አይኮካ ማዳና። *

4 ሲቆይ ዳንዳያ፣ ቃሴካ ኪያ፤ ሲቆይ ሚቃይኔና፤ ጨቁቴና፤ ኦቶሬቴና፤ 5 ቤሶንታዝ ኦቆና፣ ባርካ ባ ጎዓ ፃላላ ፃሌና። ቆሆ ቆዳን ዩጌና። 6 ሲቆይ ቱማንፔ ኣቲን ማካላን ኡፋዩቴና። 7 ሲቆይ ኡባ ዋዴ ዳንዳዬስ። ኡባ ዋዴካ አማኔስ። ኡፋይስ ኦቆሲኔ ሚኒ ኤቆስ።

8 ሲቆይ ሙሌካ ኩንዳና። ቲንቢቴይ ጊዲኮ አታና። ሃራ ቃላን ሃሳያይካ አታና። ኤራቴሊካ ሻሬታና። 9 ጋሶይካ ኑ ኤሪዛይ ወርሲ ጊደንታ ሻኪ ኤርሰ። ቲንቢቴ ሃሳያ ጊዲኮካ ባጋ ሃሳዮስ። 10 ጊደ ኣቲን ወርሴሊ ጋኪዛ ዋዴ ኩሜል ጊደንታ አሞታይ ሄ ዋዴ ሻሬታና።

11 ታ ጉላ ናቴቴላን ዳሼ ና ማላ ሃሳያይሲኔ ና ማላ ቆፓይስ። ና ማላካ ዩሻ ቆፓይስ። ካሃ ኩንሊዳፔ ጉዬ ካሴ ናቴላን ሃኒዛይሳ ወርሳካ ዬጋ አጋዲስ። 12 ኑኒ ሃሚ ቤይዛይሲ ሃላን ፃሊዛ ማላ ጮ ቦዢ ቦዢስ ሽን ሄ ዋዴ ጊዲኮ ኑ ኢዛ አይፊሶ ሎዔሊ ቤያና። ታ ሃሚ ኩሜል ጊደንታ ባጋ ፃላላ ኤራይስ። ሄ ዋዴ ጊዲኮ ታኒ ታ ሁዔስ ኤሬቴዳይሳ ማላ ኤራና።

13 ሃሳ ጊሽ አማኖይ፣ ሂዶታይኔ ሲቆይ ሃይቲ ሄዛቲ ኤቁ ዳና። ሃይታ ኡባፊ አጂዛይ ሲቆ።

14

አሞታታን ቤሲዛ ማላ ጎዔቴል

1 ሲቆ ካለቲ፤ አያና አሞቴላታ ሃራፔካ ቲንቢቴ ሃሳዬዛ አሞታታ ሎዔሊ ኮዩቴ። 2 ሃራ ቃላን ሃሳዬዛይይ ያሳስ ኣቲን ኣሳስ ሃሳዬና። ፀራ ጊዲዳ ዮዖ አያናን ሃሳዬዛ ጊሽ ኢዚ ጊዛይ ኣሳስ ጌሌና። 3 ቲንቢቴ ሃሳዬዛይይ ኣሳ ሚንጭላናስ፣ ዴንጭላናስኒ ጎዓናስ ሃሳዬስ። 4 ሃራ ቃላን ሃሳዬዛይይ ቃስ ባርካ ባና ሚንጭላስ። ቲንቢቴ ሃሳዬዛይይ ጊዲኮ ዋሳ ኩላ ጎዔስ።

* 13:2 ማቶ 17:20፤ 21:21፤ ማር 11:23 * 13:3 ታማን ፀጊኮካ ኢሲ ኢሲ ጊሻ ማፃፋቲ ኦቶሬቴላስ ጊዛ።

5 እንገንጠው ሃራ ቃላን ሃሳዬዛኮ ታ ደሳይሰ ሺን ሃሳፊካ ቦላራ እንገንጠው ተንቢቱ ቃላን ሃሳዬዛኮ ታ ደሳይሰ። ዋሳ ከላይ ሚናና ማላ ሃራ ቃላራ ሃሳዬዛዳይ ባ ሃሳዬዛይሳ ቢርሾንታ ኢዚ ሃራ ቃላራ ሃሳዬዛይሳፊ ተንቢቱ ሃሳዬዛዳይ አዴሰ። 6 ሃሳ ጊሽ ታ አሻቶ! ታ እንገንጠው ቢዛ ዋዴ ታ እንገንጠው ቆንጨሴላን ዋይኮ ኤራቴላን ዋይኮ ተንቢቱን፣ ዋይኮ ተሚርቱን የቶንታ ሃራ ቃላራ የቲኮ ሄሲ እንገንጠው አይ ጎሳኔ?

7 ሄሲ ጮ ሱሱልዔ ማላኔ ዲላ ማላ ሸምፖይ ባይንዳ ኢስታ ገሪሳሰ ዲማቴላ ሻኬቲ ኤሬቶንታ አጊኮ ኢዛ ዋሰቲ ኤራኔ? 8 ቃሴካ ፀሩምባይ አዛሰ ፑኔቲዛኮ ዋይኮ ዛዬይ አዛሰ ዛዬቲዛኮኔ ሻኪ ኤሬቶንታ ኦጌራ ፑኔቲኮ ኦኒ አላሰ ጊጌታኔ?

9 እንገንጠው ሃሳ ማላ። እንገንጠው ዲናፔ ኤሬቲዛ ቃላይ ኬዘንታ አጊኮ እንገንጠው ጊዛይሳ ኦኒ ኤራኔ? ጮ ሚላ ጫርኮን ጳያና።

10 አላሚ ቦላ ዳር ዲማ ዲማ ቃላይ ዴሰ ሺን ቢርሹላ ባይንዳ ቃላይ ባዋ። 11 ሃሳ ጊሽ አሳዳይ ሃሳዬዛ ቃላ ቢርሹላ ታ ኤሮንታ አጊኮ ሃሳዬዛዴሰ ታ አማሌ ጊዳይሰ። ኢዛዳይካ ታሰ አማላ ጊዴሰ። 12 እንገንጠው ሃሳ ማላ አያናን አምቴላታ ዴማናሰ ኮዩዛ ጊሽ ዋሳ ከላ ጎሲዛ አምቴላ ዴማናሰ ሎዔላ ኮዩቴ።

13 ሃሳ ጊሽ ሃራ ቃላን ሃሳዬዛ አሲ ባ ሃሳዬዳይሳ ቢርሹላ ኤራና ማላ ባሲ ዋሶ። 14 ታኒ ሃራ ቃላራ ዋሲዛ ዋዴ ታ አያናን ዋሳይሰ አቲን ታ ኢዛፔ አይኮካ ኤሪኬ። 15 ሂሰቲን ታ አይ ኦላና ማላ ታሰ ቤሲኬ? ታኒ ታ አያናንካ ዋሳና። ዋዘናን ዋላዳካ ዋሳና። ታ አያናንካ ዬፃና። ዋዘናራካ ዬፃና። 16 ሃሳላ ጊደንታ አጊኮ ኔ ያሴ አያናን ጋላቲዛ ዋዴ ሃሳ ኤሮንታ ኢሲ አማላ አሲ ኔ ጋላታ ዋሳ ዋሰቲ “አሚን” ጋናሰ ዳንዳዩዬ? 17 ኔ ቤሲዛ ማላ ጋላታናሰ ዳንዳያሳ። ሃንኮይሲ ጊዲኮ ኢዛን ጎሳቴና።

18 ታኒ እንገንጠው ቦላራ ሃራ ቃላን ሃሳዬዛ ጊሽ ያሴ ጋላታይሰ። 19 ጊደ አቲን ዋሳ ከላን ኤሬቶንታ ዳር ሺ ቃላታ ሃሳያናፔ ሃራ አሳታ ታማርሳናሰ አሳይ ኤሪዛ ኢቻሽ ቃላ ሃሳያና ደሳይሰ።

20 ታ አሻቶ! እንገንጠው እንገንጠው ቆፋን ጉላ ናይታ ማላ ጊደፒቴ። ኢታ ኦሶሰ ጊዲኮ ጉላ ናይታ ማላ ጊዲቴ። ቆፋን ጊዲኮ ካሃ ከንሱዳ አሳታ ጊዲቴ። 21 ካሴ ዋጋንካ “ኢስታ ቃላይ አማላ ጊዲዳ አላጋ አሳታ ቃላራ ታ ሃይሳ አሳሰ የታና።

ሃሳላ የቲንካ ታ ጊዛዘ ኢስቲ ሲዬቴና ጌሰ ጎዳይ” ጌቴቲ ካሴ ጌሻ ማፃፋን ፃፊቲዴሰ። *

* 14:21 ኢሳ 28:11-12

22 ሄሳ ጊሽ ሃራ ቃላን ሃሳያይ አማኖንታ አሳሰ ማላታ ጊዳሰ አቲን አማኒዛይታሰ ማላታ ጊዳና። ቲንቢቲይ ጊዳኮ አማኒዛይታሰ አቲን አማኖንታይሰ ጊዳና።

23 ሂሰቲኮ ዋሳ ኬላን አማኒዛ አሳይ ኢሲፌ ሸቂዳሶን ወሪካ ኤሮንታ ሃራ ቃላን ሃሳዪሽን አማላ አሳቲ ዋይኮ አማኖንታ አሳይ ሸቂዱ ሃሳዪዛሶ ጌሊኮ “ሃይቲ ጎዬቲሰ” ጌቴኔ? 24 ጊዳ አቲን አሳይ ወሪ ቲንቢቲ ቃላ ሃሳዬቲሽን አማላ ዋይኮ አማኖንታይይ ጌሊኮ ባ ሲዪዳይሳ ኡባ ኤራናኔ ሄ ቃላን ፒርዳታና። 25 ኢዛዳይ ባ ዋዘናን ቆቲ ዋላዳዚ ወሪ ቆንጫናኔ ኢዚካ ባ ባጋራ “ቱማፔ ያሲ እንቴናራ ዳሰ” ጊዳ ጉፋኒዱ ያሳሰ ጎይናና።

26 ሄሳ ጊሽ ታ አሻቶ! ሂሰቲን አይ ጊኖ? እንቴ ኢሲፌ ሸቂዛ ዋዳ እንቴፌ ኢሲ ኢሲ አሳሰ ዬላ ቃሴ ኢሲ ኢሲ አሳሰ ቲሚርቲይ ዳሰ። ኢሲ ኢሲ አሳሰ ቆንጫንታ ፀራ ሚሻታ ቆንጫሲዛ አምታይ ዳሰ። ሃራ አሳሰ ዲማ ቃላን ሃሳያና አምታይ ዳሰ። ሃራሰ ቃሴ ሄ ቃላ ቢርሼላ አምታይ ዳሰ። ሄሲ ሄ አምታይ ወሪካ አማኒዛይታ ጎዳናሰ ቤሴሰ። 27 ሃራ ቃላራ ሃሳዪዛይ ዲኮ ናምዑ አሰ ዋይኮ ዳሪ ዳሪኮ ሄቸ ጊዳዱ ታራን ታራን ዮቴቶ። ሃራ አሲ ቃሴ ቢርሹ። 28 ቢርሹዛዳይ ባይንዳ አገኮ ሸቂዳ አሳ ጊዳን ጮዑ ጊዳ ባሲ ዓላላኔ ያሳሰ ዓላላ ዮቶ።

29 ቲንቢቲ ሃሳያ አምታይ ዲዛይቲ ናቤቲ ናምዓቲ ዋይኮ ሄቸቲ ቲንቢቲ ሃሳዮቶ። ሃንኮ አሳይ ዮቴቲዳይሳ ሎዔላ ፓጮ። 30 ኡቲዳ አሳ ፓርሳፌ ኢሳዳይ ኢሲ ሚሽ ቆንጫኮ ኮይር ሃሳዪዛይሲ ጮዑ ጎ። 31 እንቴ ፓርሳፌ ኢሲ ኢሲ አሲ ታማራና ማላኔ ሚኔታና ማላ እንቴ ወሪካ ታራን ታራን ቲንቢቲ ዮታናሰ ዳንዳዬታ። 32-33 ናቤታ አያናይ ናቤታሰ አዛዜቲሰ። ፓሶይካ ያሲ ሳርቴላ ያሳፌ አቲን ዋጫማ ያሴ ጊዳና። አማኒዛይታ ዋሳ ኬላ ኡባሶንካ ሄሳ ማላ። 34 አማኒዛ አሳይ ጎይናሰ ሸቂዛሶን ማጫሳቲ ጮዑ ጌቶ። ሙሴ ዋጋይ ካሴ ጊዳ ማላ ኢሰቲ አዛዜቲቶ አቲን ሸቆሶን ኢሰቲ ሃሳያና ማላ ኢሰታሰ አሜቲቤና። 35 ማጫሳቲ ኤራናሰ ኮዪዛ ኢሲ ኢሲ ያዮቲ ዲኮ ባ ኬላን ባ አዘናታ ኦይቲቶ። ፓሶይካ ማጫሲ ሸቆሶን ሃሳያይ ዬላቲዛዛ።

36 ያሳ ቃላይ እንቴፌ ኬዚዳ? ዋይኮ እንቴኮ ዓላላ ጋኪዳ? 37 ኦኒካ ባና “ናቤ” ጊኮ ዋይኮ “ታሰ ያሎ አያናፔ አምቲላ ዳሰ” ጊዛዳይ ዲኮ ሃይሲ ታ እንቴሰ ያፊዳይሲ ጎዳ አዛዘ ጊዳዳይሳ ኤሮ። 38 ሃይሳ ኤሮንታ አሲ ዲኮ ኢዚ ባ ሁዔሰ ኤሬቴና።

39 ሄሳ ጊሽ ታ አሻቶ! ቡር ቲንቢቲ ሃሳያናሰ ሎዔላ ኮዪቴ። ዲማ ዲማ ቃላን ሃሳያካ ዲጎፍቴ። 40 ጊዳኮካ ወሪካ ማራራኔ

ዎጋራ ገደ።

15

ከርሰቶሳ ዳንዶ

1 ሃዲካ ታ ኢሸቶ! ታ እንቴና ሳባኪን እንቴ ኤኪዲኔ ኢዛን ሚኒ ኤቁዳ ሚሺራቾ ቃላ ሃዲ ቆፊሳና ኮያይሰ። 2 ታ እንቴሰ ሳባኪዳ ቃላ እንቴ ሎዔሊ ኦይኪኮ ሄ ሚሺራቾ ቃላን እንቴ አታና። ሄሳ ማላ ገደንታ አገኪ እንቴ አማኖይ ጮ ማላ ሃደ።

3 ታኒ ታሰ ኤኪዲይሳኔ ኡባፌ አቋዛይሳ እንቴሰ አላ አማዲሰ። ጌሻ ማፃፋቲ ገዛይሳ ማላ ከርሰቶሴ ኑ ናጋራ ጊሽ ሃይቁዳሰ።

* 4 ሞጌቲዳሰ፤ ጌሻ ማፃፋታን ፃፊቲዳይሳ ማላ ሄሻንሉ ጋላሰ ሃይቆፔ ዳንዲዳሰ። * 5 ሄሳፌ ካሊዲ ጴፀሮሳሰ ቤቲዳሰ። ቃሴካ ዩሱሳ ካሊዛ ታማኔ ናምዒታሰ ቤቲዳሰ። * 6 ሄሳፌ ጉዬ ኢቻሹ

ፆቱፔ ቦላራ ዲዛ አማኒዛይታሰ ኢሲቶ ቤቲዳሰ። ሄ ኢዛ ቤይዳ አሳፔ ዳሪዛ ባጋይ ፓፃ ዳሰ። ባጋይ ቃሴ ሃይቁዳሰ። 7 ሄሳፌ ጉዬ ያቆቤሰ ቤቲዳሰ። ካሊዲካ ኩሜላ ሃዋሬታሰ ቤቲዳሰ።

8-9 ታኒ ሃዋሬታ ኡባፌ ላፋኔ * ካሴ ያሳ ዋሳ ኬሌ ጎዲዳ ጊሽ ሃዋሬ ጌቲታናሰ ታኒ ቤሶንታዳኮ ሺን አሳ ወርሶፌ አወጫያ ሚሳቲዛ ታሰካ ቤቲዳሰ። * 10 ገደ አቲን ያሳ ኪያቴላን ሃዲ ታ ሃናናይሳ ሃናዲሰ። ታሰካ አሜቲዳ ያሳ ኪያቴሌ ማላ ሃደ ገዲቤና። ታኒ ኦናፔካ ቦላራ ዳሮ ሚና ኦላዲሰ። ገደ አቲን ሄሳ ኦሊዳይ ታና ገደንታ ያሳ አጾ ኪያቴሌ ኦሊዳሰ። 11 ሄሳ ጊሽ ታና ገዲን ኢሰታካ ገዲን ኑ ወሪካ ሳባኪዛይ ሄሳ። እንቴካ አማኒዳይ ሄሳ።

ሃይቁዳ አሳ ዳንላ

12 ከርሰቶሴ ሃይቆፔ ዳንዲዳይሳ ኑ ታማርሲኮ ሂሰቲን እንቴ ጋርሳፌ ኢሲ ኢሲ አሳቲ ዋኒዲ ሃይቆፔ ዳንደይ ባዋ ጊዘ? 13 ሃይቁዳ አሳሰ ዳንላ ደንታዝ ገዲኮ ከርሰቶሴካ ዳንዲቤና ጉሳካ? 14 ከርሰቶሴካ ሃይቆፔ ዳንደንታዝ ገዲኮ ኑ ሳባኮሰ ጎዳይ ባዋ። እንቴ አማኖይካ ጮ ማላ ሃደ። 15 ሄሳፌካ ቦላራ “ያሴ ከርሰቶሳ ሃይቆፔ ዳንላዳሰ” ገዲ ኑ ማርካቲዳ ማርካይካ ኑና ዋርዶ ያሳ ማርካታ ኬሴዳሰካ? ሃይቁዳ አሳይ

* 15:3 ኢሳ 53:5-12 * 15:4 ማዛ 16:8-10፤ ማቶ 12:40፤ ሃዋ 2:24-32
* 15:5 ሉቃ 24:34፤36፤ ማቶ 28:16-17፤ ማር 16:14፤ ዮሃ 20:19 * 15:8-9 ሃዋ 9:3-6 * 15:8-9 ሃዋ 8:3

ሃይቆፔ ዳንደንታዝ ገዲኮ ያሲ ኪርሰቶሳካ ዳንጢቤና ጉሳ።
 16 ጋሶይካ ሃይቆዳይቲ ዳንደንታዝ ገዲኮ ኪርሰቶሳካ ሃይቆፔ ዳንጢቤና።
 17 ኪርሰቶሴ ሃይቆፔ ዳንደንታዝ ገዲኮ እንቲ አማኖይ ጮ ማላ። እንቲካ ሃኖ ጋካናሰ እንቲ ናጋራራ ዴታ ጉሳ።
 18 ሃኖይ ሄሳ ማላ ገዲኮ ኪርሰቶሳ አማኒዲ ሃይቆዳይቲ ወሪካ ቆዩዳ ጉሳ።
 19 ኑኒ ኪርሰቶሳን ኡፋይሰ አሉዛይ ሃኖ ቢታይ ቦላ ዲሳሰ ፃላላ ገዲኮ ኑ አሳ ኡባፌ ላፋታ።

20 ገደ አቲን ኪርሰቶሴ ሃይቆዳይታሰ ኡባሰ ባይራ ገዲዲ ሃይቆፔ ቱሙ ዳንዲዴሰ።
 21 ሃይቆይ ኢሲ አሳ አዳሜ ባጋራ ዪዳ ማላ ሃይቆዳይታ ዳንጢ ኪርሰቶሳ ባጋራ።
 22 አሲ ወሪካ አዳሜ ባጋራ ሃይቆዳ ማላ ሄሳሶካ አሲ ወሪካ ኪርሰቶሳ ባጋራ ሃይቆፔ ዳንዳና።
 23 ገደ አቲን ወሪካ ባ ታራራ ታራራ ዳንዳና። ኮይሮ ባይራ ገዲዳ ኪርሰቶሴ ዳንዲዴሰ።
 ኢዛፔ ካሊዲ ኢዚ ዪዛ ዎዴ ኪርሰቶሳሰ ገዲዛይቲ ዳንዳና።
 24 ሄሳፌ ጉዬ ሃሪቲዛ ዴሪታ ጎዳቲሉኔ ዎልቃማታ ወርሲ ቆይሲዳፔ ጉዬ ካዎታ ያሳ አዋሰ አሉ አሚዛ ዎዴ ሄ ዎዴ ወርሴሰ ገዳና።

25 ኢዚ ባ ሞርኬ ወርሲካ ባ ቶሆ ጋርሰ አላና ጋካናሰ ኢዚ ካዎታናሰ ቤሴሰ። *
 26 ቡሮ ወርሴላን ያኔቲ ቆያና ሞርኬይ ሃይቆ።
 27 “ያሲ ወርሲካ ኢዛ ጎዳቲላፌ ጋርሳን ዎሉዴሰ” ገዛዚ ጌሻ ማፃፋን ፃፊቲዴሰ። ገደ አቲን “ወሪካ ኢዛ ጎዳቲላ ጋርሳን ገዲዴሰ” ገሺን ወሪካ ኢዛ ጎዳቲላ ጋርሳን አሉዳ ያሳ አዋ ጉጃና። *
 28 ወሪካ ኢዛሰ ሃሪቲዳይሳፌ ጉዬ ያሲ ወርሶፌ ቦላ ገዳና ማላ ያሳ ናይ ቃሴ ኡባ ባሲ ሃሪሲዳይሳሰ ያሳ አዋሰ ሃሪታና።

29 ሃይቆፔ ዳንጢ ደንታ አገኮ ሂሰቲን ሃይቆዳ አሳ ገሺ ገዲ ፃማቁቲዛ ኡባሰ ጎባይ አዜ? ሃይቆዳይቲ ሙሉካ ዳንደንታዝ ገዲኮ ሂሰቲን አሳይ ኢሰታ ገሺ አዛሰ ፃማቁቲዜ?
 30 ኑ ቃሰ ኡባ ዎዴ ኢታ ሜቶሰ አጂ አሜቲዛይ አዛሴ? 31 ታ አሻቶ! ሃቾ ሃቾ ሃይቆይ ታናራ ጋጌሰ። ሄሳካ ኑ ጎዳ ዬሱሰ ኪርሰቶሳ ጌደን እንቲ ቦላ ዲዛ አማኔቲላ ታ እንቲሰ ቆንጩሳይሰ።
 32 ታኒ ኤፌሶኔን ደባ ሚሳቲዛ አሳታራ ባፃቲዳይሲ አሲ ቤያና ማላ ፃላላ ገዲኮ ታሰ ኢዛን አዛ ዎዴይ ዲዜ? ሃይቆዳይታሰ ዳንጢ ደንታ አገኮ “ኑ ዎንቶ ሃይቃና ገሺ አኔ ሞሰ፣ አኔ ኡኖሰ” ገዛይታ ማላ ኑካ ኢሰታ ማላ ገደሰ። *

33 እንቲ ባሌቶፍቲ! ኢታ ላጌቲሉ ሎዎ አማሌራ ዲዛይታ ሞሬሰ።
 34 ዎዝናማ ገዲቲ፤ ናጋራ አሉፍቲ፤ ያሴ ኤሮንታይታ

* 15:25 ማዛ 110:1 * 15:27 ማዛ 8:6 * 15:32 ኢሳ 22:13

ኢሲ ኢሲ አሳቲ አንቲ ጋርሳን ዲዛ ገሽ ታ ሄሳ አንቲና ዬላቻናሰ ገይሰ።

ሃይቆፔ ዳንዳና አሳቴሰ

35 “ሃይቆዳይቲ ዋኒ ዳንዳኔ? አይ ማላ አሾራ ዳንዳኔ?” ጊዛዳይ ዳና ዳንዳዬሰ። 36 ኔኖ ኤያዘ! ኔ ዜሪዛ ዜሪላይ ሃይቆንታ ዲሼ ጫሪና። 37 ኔኒ ዜሪዛ ካላ ሞዴያ ገሰቲ ዋይኮ ሃራ ካላ አይፌ ገዲኮካ ጉዬፔ ኔ ኤካናራ ሃሲ ኔ ዜሮሮ ገዲኮ። 38 ያሲ ቃሴ ባ ኮይዳ ማላ ሄ ዜሪላሰ ኢዛ ማላ ሜቶ አሜሰ። ዜሪላ ቆሞታሰ አሳሰ አሳሰ ኢዛ ሚሳቲዛ አሳቴሰ አሜሰ።

39 አሾይ ወሪካ ኢሲ ማላ ገዳና። አሳ አሾይ አሳ ገዲሺን ሜሄ አሾይ ቃሴ ሃራ፤ ካሮ አሾይ ሃራ፤ ሞሌ አሾይካ ሃራ ቆሞ።

40 ሄሳ ማላካ ሳሎን ዲዛይታሲካ ኢሰታ ሚሳቲዛ ሜቶይ ዳሰ። ቢታ ቦላ ዲዛይታሲካ ኢሰታ ሚሳቲዛ ሜቶይ ዳሰ። ገዶ አቲን ሳሎይታ ቦንቾይ ኢሲ ማላ። ቢታ ቦላ ዲዛይታ ሜቶ ቦንቾይካ ዲማ። 41 አዎ አርሼ ቦንቾይ ኢሲና። ገዶ አቲን አገና ቦንቾይ ቃሴ ዲማ። ያለንቲታ ቦንቾይካ ሃራ። ኢሲ ያለንቲ ቦንቾይ ሃራ ያለንቲ ቦንቾፌ ዲማቴሰ።

42 ሃይቆዳ አሳ ዳንጢካ ሄሳ ማላ። ዋቀዛ ሜቶይ ዜሪቲን ዋቆንታ ሜቶይ ዳንዳና። 43 ካወሻቴላን ዜሪታና ሺን ቦንቾን ዳንዳና። ዳቡርሳን ዜሪታና ሺን ዋልቃማ ገዲዲ ዳንዳና። 44 ሜጴቴሰ ሜቶይ ዜሪታና ሺን አያና ሜቶይ ዳንዳና። ሜጴቴሰ ሜቶይ ዲኮ ቃሴካ አያና ሜቶይካ ዳሰ።

45 ሄሳ ገሽ “ኮይሮ አሰ አዳሜይ ዳይይ ዲዛ ሜጴቴሰ ገዲዳሰ” ጌቲቲ ጌሻ ማፃፋን ፃፌቲዳሰ። ናሞዓንሉ አዳሜ ገዲዳ ከርሰቶሲ ገዲኮ አሳሰ ዳይ አሚዛ አያና። * 46 ገዶ አቲን ኮይሮ ዪዳይ አያናይሳ ገዶንታ ሜጴቴላይሳ። አያናይሲ ቃሰ ጉዬፔ ዪዳይሳ። 47 ኮይሮ ዪዳ አዳሜይ ቢታፌ ሜጴቴዳ ገሽ ኢዚ ቢታፌ። ናሞዓንሉ ዪዳይሲ ሳሎ። 48 ቢታፌ ገዲዳይቲ ኢሰቲ ቢታፌ ሜጴቴዳይሳ ማላ። ሳሎፔ ገዲዳይቲ ሳሎፔ ዪዳይሳ ማላ። 49 ኔኒ ቢታ አሳ ሜቶ ማዮይሳሳካ ሳሎይሳ ሜቶካ ማይዳና።

50 ታ ኢሻቶ! ታ ሃይሳ አንቲሰ ዮታይሰ አሾይኔ ሱሌ ያሳ ካዋቴሰ ላቴቲና። ቆያናይሲ ቆዮንታይሳ ሳቴና።

51 አኔ ታ አንቲሰ ኢሲ ፀራ ዮዖ ዮታይሰ። ኔኒ ወሪካ ሃይቆኮ። ገዶ አቲን ኑ ወሪካ ላሜታና። 52 ሄሲካ ሃናናይ ኑ ቆፖንታ ዲሺን

* 15:45 ሜጴ 2:7

ወርሴላ ፀረምባይ ፑኔተዛ ዎዴ ቂጲዳ ኣይፌይ ያሊዛ ማላ ኢሲቶ ሃናና። ፀረምባይ ፑኔተና፤ ሃይቂዳ ኣሳይ ዎቆንታይታ ጊዲዲ ዴንዳና። ኩኒካ ለሜታና። 53 ቆዩዛይሲ ቆዮንታይሳ ማይዳናስ። ሃይቂዛይ ሃይቆንታይሳ ማይዳናስ ቤሴስ።

54 ቆዩዛይ ቆዮንታዝ። ሃይቂዛይ ሃይቆንታዝ ማይዲዛ ዎዴ “ሃይቆይ ያኔቲ ሚቲቲዴስ” ጌቲቲ ካሴ ጌሻ ማፃፋን ፃፊቲዳ ቃላይ ፖሌታና። * 55 ሄሳሶካ “ሃይቆ! ካሴ ኔ ያናይ ኣዎን ዲዜ?”

ሃይቆኮ! ኔ ኢዛራ ጫዲዛ ዪሻይ ኣዎን ዲዜ?” ጌቲቲ ፃፊቲዴስ። * 56 ሃይቆይ ኢዛራ ዲኪዛ ዎልቃይ ናጋራ፤ ናጋራ ዎልቃይ ዎጋ። 57 ጊዶ ኣቲን ጎዳ ዬሱስ ከርሰቶሳ ባጋራ ኩስ ያና ኢሚዛ ያሳስ ጋላታይ ጊዶ።

58 ሄሳ ጊሽ ታ ሲቆ ኣሻቶ! ሚኒ ኤቂቲ። ኣይ ሚሻንካ ያርክ ያርኮፍቲ። ጎዳ ኦሶስ ኣንቲ ዳቡሪዛ ዳቡርሳይ ሃዳ ጊዶንታይሳ ኤሪዲ ኡባ ዎዴ ፓጩይ ባይንዳ ጎዳስ ኦላናስ ሚኔቲቲ።

16

ዩሩሳሌምን ዎዩቲዛ ኣማኒዛይታስ ሚሻ ኬሶ

1 ሃሩ ቃሴ ኣማኒዛይታስ ሚሻ ኬሶ ጊሽ ጋላቲያን ዲዛ ዎሳ ኬላታስ ታኒ ኣሚዳ ኣዛዞ ማላ ኣንቲካ ኦሊቲ። * 2 ሚሻይ ኬዛናይ ቡሮ ታ ሄ ቢን ጊዶንታ ማላ ኣንቲፌ ኢሲ ኢሲ ኣሲ ባሲ ዲዛ ማላ ሳሚንታን ሳሚንታን ኢሲ ጋላስ ዎጋ ዎጋ ኬሲ ዎላ። 3 ታ ሄ ቢዛ ዎዴ ኣንቲ ዶሪዳ ኣሳታስ ታ ሞይዞ ዳብዳቤ ፃፋ ኣማዳ። ኢሰቲ ኣንቲ ኣሚዳ ኢሞታ ዩሩሳሌም ጋላና ማላ ሃፔ ታ ኪታና። 4 ታ ኢሰታራ ባናስ ኮሺዛዝ ጊዲኮ ታናራ ባንዴቲስ።

ጳውሎሳስ ኦጌ ባና ቆፋ

5 ታኒ ባሼ ማቂዶኒያራ ኣቆ ቡሲ ታስ ኣቶንታ ጊሽ ታ ማቂዶኒያ ጋካዳ ሄራ ኣንቲኮ ባና። * 6 ታ ኣዎካ ቢሺን ታና ኦጌይ ዎይሶንታ ማላ ኣንቲ ታና ማዳና ማላ ባሼ ታ ኣንቲ ኣቻን ጋምዶንታ ኣጊኬ። ኦኔ ኤሪዛይ ባልጎይ ኣቆና ጋካናስ ታ ኣንቲ ኣቻን ባልጎዛ ኣላንታ ዎያ ኣጋና። 7 ታ ኣንቲ ኣቻን ዳሮ ዎዴ ጋምዳናስ ኮዪዛ ጊሽ ኣንቲና ጮ ኦጌራ ኣቆ ባሼ ቤያናስ ኮዪኬ። ጎዳ ሼኔ ጊዲኮ ኣንቲ ኣቻን ኣዲሳ ዎዴ ጋምዳናስ ኮያይስ።

* 15:54 ኢሳ 25:8 * 15:55 ሆሴ 13:14 * 16:1 ኦር 15:25-26
* 16:5 ሃዎ 19:21

8 ጊዶ ኣቲን ጳንፃቆስቴ ጌቴቴዛ ባዓሌ ጋላስ ጋካናስ ታ ኤፌሶንን ጋሞዓና። * 9 ታ ሃን ጋሞዓና ጋሶይካ ታስ ሃን ጊታ ኦሶ ፔንጌይ ዶፎቴዳስ ሺን ታናራ ኤቁቴዛይቴ ዳርቲ ዳቴስ።

10 ጃሞቶሲ ኢንቴኮ ቢኮ ኢዚ ታ ማላ ጎዳ ኦሳንቻ ጊዲዳ ጊሽ ኢዚ ባቦይ ባይንዳ ዳና ማላ ኢንቴ ኢዛ ማዲቴ። * 11 ሃሳ ጊሽ ኦኒካ ኢዛ ካቶፖ። ኢዚ ታኮ ሳሮን ሲማና ማላ ኢንቴ ማዲቴ። ኑካ ሃራ ኣማኒዛይታራ ኢዛ ዩሳ ናጎን ደስ።

12 ኑ ኢሻ ኣጲሎሲ ሃራ ኣማኒዛይታራ ኢንቴኮ ባና ማላ ኬሃ ዋሳዲስ ሺን ኢዚ ቃስ ሃዒ ኢንቴኮ ባናስ ኮይቤና። ጊዶ ኣቲን ባና ኦጌይ ጊሺን ኢዚ ኢንቴኮ ባና።

ወሪሴሳ ዞሬኔ ሳርካ

13 ቤጊቴ! ኣማኖን ማኒ ኤቁቴ፤ ማኒቴ፤ ጎብቴ። 14 ኢንቴ ኦላዛዝ ወርሲካ ሲቆን ኦላቴ።

15 ታ ኢሻቶ! ኣካያ ቢታን ኮይሮ ኣማኒዳይ ኢስቲፋኖሴሶ ኣሳ ጊዲዳይሳኔ ኣማኒዛ ኣሳ ማዳናስ ኢስቲ ባና ኣላ ኢሚዳይሳ ኢንቴካ ኤሬታ። * 16 ኢስታ ሚሳቲዛ ኣሳታሲኔ ኢስታራ ኢሲፌ ዳቡሪዛ ኣሳታስ ኡባስ ኣዛዜታና ማላ ታ ኢንቴና ዋሳይስ።

17 ኢስቲፋኖሴ፡ ፊርዶናዖሴኔ ኣካይቆሲ ዩዳ ጊሽ ታ ዳር ኡፋዬታይስ። ጋሶይካ ኢንቴ ሃን ታናራ ዶንታ ጊሽ ኢስቲ ታስ ፓጪዛዝ ወርሲ ኩንላዳ። 18 ታ ዋዝናኔ ኢንቴ ዋዝና ወርሲ ሽሞፒሲዳ። ሃሳ ጊሽ ሃሳንታ ማላ ኣሳታ ሙሌ ባሎፒቴ።

19 ኢሲያ ቢታን ዲዛ ዋሳ ኬላቲ ኢንቴና ሳር ጌቴስ። ኣቁላይኔ ጲርሲቁላይካ ኢስታ ሶን ሺቁዛ ኣማኒዛ ኣሳይ ጎዳ ሱንላን ቦንቾ ሳርታ ኢንቴስ ሺጄቴስ። * 20 ሃን ኣማኒዛይቴ ወርካ ኢንቴና ሳር ጌቴስ። ኢንቴ ኢንቴ ጊዶን ኢሲይ ኢሳራ ሲቆ ዬሬቴላ ዬሬቴቴ።

21 ሃይሳ ሳርካ ታ ኩሼራ ፃፊዳይ ታና ጳወሎሳ።
22 ጎዳ ዶሶንታይይ ዲኮ ኢዚ ቃንጌቴዳዴ ጊዶ! ጎዶ ሃያ!
23 ጎዳ ዬሱሳ ኪያቴላ ኢንቴናራ ጊዶ።
24 ታ ሲቆይ ጎዳ ዬሱስ ኪርሰቶሳ ባጋራ ኢንቴስ ኡባስ ጊዶ። ኣማን።

* 16:8 ለዌ 23:15-21፤ ዛሬ 16:9-11 * 16:10 1ቆር 4:17 * 16:15
1ቆር 1:16 * 16:19 ሃዋ 18:2

ኑራሳ ጩቆ ማፃፋ ንሞሉ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

xxx

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022
dffa0cbb-5f77-5875-bf95-f4176677af45